

Na Taroha Goro 'Onaai Usua Ana St. Mak

Gere Mamaani 'Iniai Bukani

'O 'adoma'inia do 'e taha na goro di'u 'inia Jisas? 'Onaa 'o ga'i usua ta mamaani 'inia, 'e taha na'o ga'i maania 'inia?

'Ia Matiu, Mak, Luk mea Jon rau sigihi'i mwane mamaani he'ete'i hairiu 'inia Jisas 'oha rau usu'i Taroha Goro adaa'i. 'Ia Mak 'a goro ana di'u 'anai maani'i ha'abu'ohu na haa'i mana 'a'auhiraau na haa i noni. 'Ai ragoi dora na'i bukani na'oi sadoia do 'ia Mak 'a mamaani wetewete tarau 'ini'i mareho 'isi. 'Ia Mak 'a rabasia do 'iraau noni rai aidangisia do 'ia Jisas 'a ha'ata'inia hura'a i heita'ahi ana suri'i mareho na haa'i.

'Ia Mak 'a ha'ata'inia goro tanagaau do 'ia Jisas 'a boi 'onaai sae tatau'aro. 'Inia 'ia Jisas naasi na Ha'atahi, 'iia 'a matai haua namoiwou ta maho nai 'adoma'inia. Mana mareho na 'adoma'inia 'anai haua, naasi 'anai 'a'auhiraau noni na'i tahitahi adaa'i. 'Iia ai'a do 'ai ura ha'atau ma do 'aigui hadahada tanaraau, ma'ata 'a 'ariwou gaarangi'raau ma heinagu beiraau na'i dora na 'iraau rai matai hataria, nei narai hei'irara'i beia.

'E taha na'o 'adoma'inia do'o ga'i usua 'abaia Jisas? Na'i 'oha na 'oi 'oha'iniai bukani, 'oi 'ome'ome 'ini'i herengana'i a Jisas na'o 'adoma'ini'i dora goro di'u.

Na Heitaroha'i Ana Jon Bwareomaea

(*Matiu 3:1-12; Luk 3:1-18; Jon 1:19-28*)

1 ¹Naani Taroha Goro 'inia Jisas Kraest, Garena God. ²Na'i buka ana Raabea Aisaea, 'ia God 'a o'ani,

“Inau wai ha'ataarai sae heitaroha'i agua na'i na'o 'ini'o, 'iia nai ha'aagauraaui noni 'anai boi amua.”[†]

³'Ai totoro hura'a na'i dora mangasara.

'Ai ha'atee o'ani,

'Moi ha'aagau! 'Ia Araha 'a gaarangi boi'a. Moi ha'a-odoodoi tara tanaa.”^{††}

⁴⁻⁶Hoita, 'ia Jon Bwareomaea naasi sae heitaroha'isi. 'A boi ma awa na'i dora mangasara. Bwana ana ra tau'arona 'iniai warihui kamel mana

rorowa'a ana, 'e uri-uri mwamwaa. Na mahoingau ana, naasi ngabo mana modi'o ni hasimou.

'A bwareomaearai sae ma 'unua tanaraau o'ani, "Moi rihosi baani'i mwani baronga ta'a'i amoo'i mamoi bwareomaea, mia God 'ai 'adoma'i nugasi'i 'inomoo'i."

Ma na'i 'ohasi, ragoi sae na'i Jerusalem mana tara'i 'omaa na'i Provensi Jiudea nara boi 'anai bahurongoa Jon. Marau ha'arangasi'i ora-ora'a-daa'i ma bwareomaearaau na'i wai Jordan.

⁷Ma naani maho na maania tanaraau sae, "Na nei nai boi na'i murigu, 'a ororiu di'uau. 'Inau ai'a arari 'anai mwaoro auru 'anai wagasi'i sandol ana'i. ⁸'Inau 'au bwareomaea'amou 'inia moi wai, me 'iia 'ai bwareomaea'amou 'inia'i Hi'ona Maea."

Na Bwareomaea Mana Heihongi Ana Jisas

(Matiu 3:13-17; 4:1-11; Luk 3:21-22; 4:1-13)

⁹Na'i muri 'ia Jisas 'a hano baaniai Nasaret, 'e 'omaa ni Provensi Galili, ma 'ari na 'ia Jon 'agu bwareomaeaa Jisas na'i wai Jordan. ¹⁰Ma na'i 'oha 'ia Jisas 'a ara'a baaniai wai, 'a 'omesiai aro 'a heihoa mana Hi'ona Maea 'a dio na'i hungana 'onaai waibora. ¹¹Mana aohanai ringe na ao dio mai baaniai aro 'a o'ani, "I'oe na garegu nau ta'ahi'o ororiu, mau ahugoro 'ini'o."

¹²Na'i mau 'ohasi, mana Hi'ona Maea 'a ha'ataaria Jisas 'ari na'i dora mangasara. ¹³Ma na'i ro'u 'isi, 'iraau mwamwaa wasi rau awa na'iei. 'A awa 'isi suriai hai tangahurui dangi, mia Saetan 'a ohongia iei a Jisas. 'Iraau enjel rau boi marau taguma'inia.

Jisas 'A Soiraaui Hai Sae Ahuahusi

(Matiu 4:12-22; Luk 4:14-15; 5:1-11)

¹⁴Ia Jisas 'a 'ari na'i Provensi Galili na'i 'oha 'ia Herod 'a bwane nugaa'a Jon Bwareomaea na'i rumaniho'o. 'A 'ari 'anai taroha'inia'i Taroha Goro na boi baania God. ¹⁵'A ha'atee o'ani, "Na heimarungi ana God 'a gaarangi'a. Moi rihosi baani'i ora-ora'a amoo'i mamoi hinihiniai Taroha Goro!"

¹⁶Ma na'i 'oha 'ia Jisas 'a hatare na'i one i Galili, 'a re'ia Saemon mana do'orana 'ia Andru. Na'i 'ohasi, raru ahuasi 'inia hu'o, 'inia 'iraruasi ra'i sae ahu-ahuasi. ¹⁷Mia Jisas 'a o'ani 'ini'ararua, "Murui suriau! 'Onaai rau'i amuru'i ii'a na'i wai, 'a o'asi ro'u, wai ha'ausuri'amurua 'anai wairaaui mai sae beiau." ¹⁸Na'i mau 'ohasi, raru nugasi'i hu'o adaru'i ma raru suria.

¹⁹Ma gere 'ari ro'u wou baaniai dorasi ma re'irarua Jems mea Jon, rua garena Sebedi. Raru awa na'i ora adaau, rau orima'ini'i hu'o adaa'i. ²⁰Ma na'i 'oha 'ia Jisas 'a re'irarua, 'a soirarua. Me'irarua raru hano baania amadarua miraui sae tatau'aro narau awa na'i ora. Ma raru hano beia Jisas.

'E Sae Na Adaro 'A Bwaunia

(Luk 4:31-37)

²¹Mia Jisas mana rongoiusuri ana'i rau taha na'i 'omaai Kapaniam. Ma na'i dangi ni mamaro adaui Jiu, 'ia Jisas 'a siri na'i ruma ni ha'arahesi ma ha'ausuriraui sae. ²²Miraui nei narau rongoi mareho na maani'i rau

heimwaota'i di'u 'ini'i ha'ausuringa'i ana'i, 'inia rau 'iraraa do 'a aidangisi'i goro i mareho na maani'i. 'Iia 'a ai'a 'onaairaaui Ha'ausuri 'anai Ringe ana'i Moses. ²³Ma na'i 'ohasi 'e sae na adaro 'a bwaunia 'a awara raha o'ani, ²⁴"Jisas, saeni Nasaret, 'o raba 'uaameuni? 'O boi 'anai ha'a-ta'ai'ameu? 'Inau 'au 'iraraa ha'agorohi'o! I'oe nei na maea na'o boi baania God."

²⁵Mia Jisas 'a ha'atee hurasi o'ani, "Oi papaku, ma'oi hura'a mai baania mo'osi!" ²⁶Mana adarosi 'a 'ihara'iniiai saesi ma awara raha ro'u maagu hura'a baania.

²⁷Miraaui mwane sae rau heimwaota'i ro'u marau ha'atee hairiu o'ani, "Romwane! 'E tahasi? 'E ha'ausuringa'i haoru naasi, 'inia na ha'atee ana'i ra wetewete 'onaai sae na to'o mena! Rei'uaa adaro ma ra araisuria ro'u."

²⁸Mana taroha 'inia Jisas 'a 'adarara 'ari suri'i 'omaa hako na'i Galili.

Jisas 'A Ha'agorohira Aho'i

Mwani Sae Ra Daoha

(*Matiu 8:14-17; Luk 4:38-44*)

²⁹Ma na'i 'ohasi 'ia Jisas beia Jems mea Jon, rau hano baaniai ruma ni ha'arahesi marau 'ari na'i ruma ana Saemon mea Andru. ³⁰Ma na'i 'oha rau siri wou i ruma, 'ia Jisas 'a rongoa do na hungona Saemon 'a awa moi na'i be'ana, 'inia 'a mata'i ma raorao i abena. ³¹Mia Jisas 'a 'ari wou beia, 'a dau na'i rimana ma ha'a-suruta'ea ara'a. Na'i 'ohasi mana mata'i 'a rigisia'a. Naasi mana uraosi 'a ha'aagau mahoingau 'adaau.

³²Mana'i su'urahisi 'oha na sina 'a bura'i suu, mana dangi ni mamaro 'a hako'a, ra waa'i mai inoni nara daoha tanaa Jisas mana nei na ra bwaunira i adaro. ³³Miraaui hakoi inoni na'i 'omaasi narau rurugoni mai na'i rumasi.

³⁴Mia Jisas 'a ha'agorohi'i mwane daoha he'ete'i hairiu, ma taari'i hura'ai mwane adaro baani'i sae. Ma'ata 'a ai'a waterai adaro do rai 'unua hura'a do 'iia naasi garena God, 'inia 'a ai'a rabasia do rai taroha'inia tanaraaui inoni.†

³⁵Ma na'i mau i wa'aria, 'ia Jisas 'a rarai mai ma 'ari dora 'etea 'anai ha'arahesi. ³⁶Ma na'i 'oha na rarai a Saemon miraaui nei narau ta'i awa, maraugu ai'a re'ia'a Jisas, raugu sibania. ³⁷Ma na'i 'oha rau sadoia, rau o'ani 'inia, "Iraau hakoi sae rau sibani'o!"

³⁸Mia Jisas 'a ha'atee tanaraau o'ani, "Au 'iraraa. Ma'ata 'au raba taroha'iniiai Taroha Goro tanaraaui sae suri'i ro'u i 'omaa 'isi. 'Inia naasi taranai taha nau boi 'inia." ³⁹Mia Jisas 'a 'ari suri'i ruma ni ha'arahesi suri'i mwani 'omaa na'i Galili ma taroha'iniiai Taroha Goro ma taari'i hura'ai adaro baaniraaui sae.

Jisas 'A Ha'agorohia Aho'i Sae Lepa

(*Matiu 8:1-4; Luk 5:12-16*)

⁴⁰Hoita, 'e sae lepa 'a boi ma topira'i ruru dio tanaa Jisas ma ha'angonia o'ani, "Onaa 'o mwa'emwa'e, ma'lo ga'i ha'agorohiau baaniai daoha na to'iauni."

1:34 'Ia Jisas 'a ha'aabu'i adaro 'inia rau gasi rangasia do 'iia naasi, garena God, me 'iraaui sae ririhunga'i rai taesu'a marai ha'abwarasiai tau'aro ana.

41'Ia Jisas 'a ta'ahia. 'A taranga'inia hura'ai rimana, 'a dau wou beia ma o'ani, "Io, 'au mwa'emwa'e moi, 'oi goro'a aho'i!" 42'Na'i mau 'ohasi mana abena 'agu goro aho'i.

43-44'Na'i 'ohasi 'ia Jisas 'a ha'aabua wetewete a mo'osi, 'a o'ani 'inia, "Oi abu maania ga'u tanaa ta sae i maho na to'o bei'o. 'Oi 'ari odo-odo beiai Piriisi mai 'iraraa haaria do i'oe 'o goro aho'i. Naasi ma'oi hauai bane amua tanaai Piriisi mai ho'asi 'inia 'onaai 'unua ana Moses, 'anai ha'ata'inia tanaraau noni do'o goro'a." Na'i 'ohasi 'ia Jisas 'a ha'ataaria 'ari. 45'Mia mo'osi 'a ai'a araisuria Jisas ma taroha'inia moe'a 'ari tanarai mwani sae, tarana naia na 'ia Jisas 'a ai'a 'ari ha'ata'i 'inia suri'i 'omaa. Ma awa moi hura'a suri'i dora na ai'a ta sae nai awa iei. Rei'uua na o'asi, sae suri'i 'omaa rago rau sadoia marau rurugoni mai beia.

Jisas 'A Ha'agorohia Aho'i

Sae Na Nugu i Abena

(Matiu 9:1-8; Luk 5:17-26)

2¹Ma hako i taringai dangi, 'ia Jisas 'a aho'i 'ari na'i Kapaniam. Miraau inoni rau 'iraraa do'a awa na'i ruma na bwani awa-awa iei ga'u ani. 2Ma ragoi nei ra boi beia Jisas ma ai'a dora taradaau na'i ruma ma'ua na'i abau 'omaa. Mia Jisas 'a ha-ha'ausuri 'ini'i ha'atee ana'ia God. 3Ma'e waira hai rau suru'ia mai sae na nugu abena mana saesi 'a dadao na'i be'ana. 4Me 'inia rago di'u anai sae, 'a bwara tanaraau suru'ia siri saesi tanaa Jisas. Naasi marau suru'ia ta'eha suriai tara hanehane 'anai ta'eha na'i hunganai rumasi. Na hunganai rumasi 'a sada moi. 'Oha narau taha ta'eha, rau tahangiai dora na'i goroi odohana Jisas, marau toto'oa dio a mo'osi na'i 'ubutadaa'i sae nara awa na'i rumasi. 5Mia Jisas 'a 'ome 'iraraai hinihinidaau magu ha'atee o'ani 'inia mo'o narau toto'oa diosi, "Gare agu, na ora-ora'a amuli 'au 'adoma'i nugasili hako."

6'Na'i 'ohasi ra'i Ha'ausuri 'anai Ringe ana'ia Moses rau awa ro'u 'isi. Miraau 'ado'ado o'ani, 7"Ni 'uaana nugu 'unua 'inia marehosi? 'A ga'i bwa'i o'asi! 'A 'adoma'inia do 'iia naasia God? 'Ia moia God na matai 'adoma'i nugasili ora-ora'a! 'Iia 'a ha'atee ha'ata'aia God!"

8'Ia Jisas 'a 'iraraai 'adoma'idaau ma ha'atee o'ani 'iniraa, "A 'ua namou to'oraa 'inia 'adoma'isi bei'amou? 9Taha na mwada'u? 'Anai 'unua tanaai saesi do'au 'adoma'i nugasili ora-ora'a ana'i, ma'ua 'anai 'unua tanaa do'ai ura maai suru'iai be'ana maai hahano? 'Anai 'unua tanaa mo'osi do'au 'adoma'i nugasili ora-ora'a ana'i 'a mwada'u, 'inia 'a bwarai 'iraraa 'onaa ra 'adoma'i nugasili ora-ora'a ana'i ma'ua ai'a. 10Naasi, 'inau i Gare'i Inoni, wai hauai maho namou 'adoma'i ha'abwaraa mamoigu'i 'iraraa do 'au to'oraa ro'u i mena 'anai 'adoma'i nugasili ora-ora'a na'i marewanani."

Naasi magu o'ani 'inia sae na abe nugu, 11"Nau wai 'unua tana'o, 'oi ura ara'a, 'oi suru'iai be'amu, ma'oi 'ari ruma amua!" 12Na saesi 'a ura odo-odo ara'a, 'a suru'iai be'ana ma hura'a. Miraau inoni hako rau wanasia marau heimwaota'i di'u. Rau ha'aasaa God 'inia marau ha'atee o'ani, "I'ameu meu ai'a 'omesia ga'u ta mareho o'ani!"

Jisas 'A 'Ome Sigihia Livae*(Matiu 9:9-13; Luk 5:27-32)*

13'E ta'i 'oha ro'u, 'ia Jisas 'a 'ari bobonai kae bwera i Galili. Mana ruruhai sae rago rau rurugoni mai beia magu ha'ausuriraau. 14Ma na'i 'oha na gere hahano sara wou, 'a re'ia Livae, 'e sae ha-ha'atakisi. 'Iia 'e garena Alfias. 'A heinagu na'i dora-ni-horihori takisi mia Jisas 'a ha'atee o'ani 'inia, "Oi boi suriau 'onaai rongoiusuri agua!" 'Ia Livae 'a ura ara'a ma suria'a.

15'Ari wou mia Jisas mana rongoiusuri ana'i rau ngau na'i ruma ana Livae. 'A ragoi sae ha'atakisi ta'aa mana sae ta'aa rau suria Jisas marau ngau beiraa. 16Tara'i Ha'ausuri 'anai Ringe ana'ia Moses nara aba beiraaui Farisei rau re'i'i sae 'isi 'oha rau ngau beia Jisas. Marau songa'iniraaui rongoiusuri ana'i o'ani, "Ni 'uaana na ngau 'inia beiraaui sae ha-ha'atakisi miraaui sae ta'a'isi?"

17'Ia Jisas 'a rongoraaui ma aramiraaui o'ani, "Na sae nara goro moi abedi ra bwa'i rabasiai 'a'au baaniai sae na matai ha'agorohi'i daoha, me 'iraaui moi nei nara daoha nara rabasiai 'a'au. 'A o'asi ro'u, 'inau boi na'i marewanani, ai'a do 'anai 'a'auhiraau inoni odo-odo, ma'ata 'au boi 'anai 'a'auhiraau inoni ora-ora'a."

Ha'ausuringa'i Bwani 'A Bwa'i 'Ari Goni**Beiai Ha'ausuringa'i Haoru Ana Jisas***(Matiu 9:14-17; Luk 5:33-39)*

18Ma tara'i 'oha na rongoiusuri ana'ia Jon Bwareomaea miraaui na Farisei rau ha'ariri 'ini ngau 'anai ha'arahesi. Ma'e ta'i 'oha ra'i sae ra boi beia Jisas 'anai songa'inia, rau ha'atee o'ani, "Iraaui rongoiusuri ana'ia Jon Bwareomaea miraaui rongoiusuri adaa'i Farisei ra suriai ringe 'ini nuga ngau. Ni 'uaana na 'iraaui rongoiusuri amu'i rau ai'a?"

19Mia Jisas 'a aramiraaui, 'a ha'atee o'ani, "A 'ua? 'I'amou mou 'adoma'inia do 'iraaui nei ra awa na'i rongo-ni-ha'iwai rai ha'aririta'i ngau 'oha na awa beiraaui a mo'o ra ha'aha'iwai? 'Abwa'i! 'Oha na nei na ha'iwai 'a awa beiraaui sae 'isi, raugu bwa'i 'asu'ani awa ha'i hioro moi. 20Ma'ata tari 'oha na nei na ha'iwai rai waia baaniraaui, ma raigui matai ha'aririta'i ngau 'inia ahutotou adaaui.†

21"Mana nata maho ro'u, 'a bwa'i nei nai haa ta maakari bwana haoru 'anai tai bwarasiai dora na maakari na'i bwana bwani. 'Onaa nai haua o'asi, na'i 'oha raigui wasiai bwanasi, na maakari bwana haorusi 'ai niniro. Mai haa ta kae maakari nai raha di'u ro'u na'i bwana bwanisi. 'Inia na maakari bwana haoru ai'a ta'isada beiai bwana bwani.

22"Nata mareho ro'u, 'abwa'i nei nai matai nuga waen haoru suri'i bei bwani nara tagora'i 'ini'i uri-uri mwamwaa, 'inia na bei bwani ra bwane 'a'asi. Na'i 'oha na waen haoru 'ai su'u, na bei bwani rai pusu. Naasi mana

2:19-20 Ni 'ado'ado 'anai heiha'auuni 'a o'ani. 'A ai'a ta'isada do'iraaui rongoiusuri agu'i rai nuga ngau 'oha na 'ia Jisas 'a awa mau beiraaui. Na'i 'oha na 'ia God 'ai waia Jisas ara'ai aro, 'a arari dora'i ha'aririta'i ngau 'inia ahutotou adaaui.

waen rai ahe gata'ini'i, mana bei rai maakari ta'a'i. Na waen haoru rai niga'i ma'ata na'i bei haoru ro'u. 'Inia ni waen haoru ai'a ta'isada beiai bei bwani."

Sae Ra Ororiu Di'uai Dangi ni Mamaro

(*Matiu 12:1-8; Luk 6:1-5*)

23Ma'e ta'i dangi ni mamaro adaau Jiu, 'ia Jisas miraaui rongoiusuri ana'i rau tahahoro na'i 'ubutadi mou wiit. Me 'iraaui rongoiusuri raugu rahi'i tara'i kora. 24'Oha 'iraaui na Farisei rau re'iraaui, raugu ha'atee o'ani 'inia Jisas, "Ei! Rau ga'i bwa'i husi'i wiit 'isi. Na Ringe ana'ia Moses 'a ha'aabuai tau'aro na'i dangi ni mamaro!"

25-26Mia Jisas 'a ha'atee o'ani, "A 'ua? Mou ai'a 'oha'inia mamaani 'inia Mwaeraha Deved mana nei rau ta'i hano na'i 'oha narau hioro? 'A to'o na'i madoraa ana 'Abaeata, i Na'ohadaau Piriisi. 'Ia Deved 'a siri na'i Ruma Maea Saira ana God ma ngaai brede maea ra haa tanaa God, ma ha'angauraa ro'u 'ini'i sae ana'i. Na'i Ringe ana'ia Moses 'a 'unua do'iraaui moi na Piriisi na rau matai ngaai bredisi. 'Omena, 'ia Deved 'a horosia ro'u i ringeringe!"

27Mia Jisas 'a 'unua tanaraau o'ani, "Na dangi ni mamaro, 'ia God 'a haua 'anai 'a'uhiraaui moi sae, ma ai'a 'anai ha'abwara'i maho tanaraau. 28Me 'inau, na Gare'i Inoni, 'inau 'au matai 'unu'i maho 'iraaui sae ra matai haa'i na'i dangi ni mamaro. 'Inia 'inau naasi Araha 'anai dangi ni mamaro."

Sae Na Mae i Rimana

(*Matiu 12:9-14; Luk 6:6-11*)

3 1'E ta'i 'oha ro'u, 'ia Jisas 'a siri na'i ruma ni ha'arahesi. Ma'e sae na mae i rimana, 'a awa na'isi. 2Miraau na Farisei rau 'ome'ome 'onaa 'ia Jisas 'ai ha'agorohia aho'i sae na mae i rimanasi, do nei narai subunia do'a hauai tau'aro na'i dangi ni mamaro.

3'Ia Jisas 'a 'unua tanaai saesi do 'ai ara'a urai na'o.

4Ma songa'iniraaui o'ani, "A 'ua? 'E taha na Ringe ana'ia Moses 'a ha'awategaau 'anai haua na'i dangi ni mamaro? 'Anai haa'i mareho goro, ma'uasi 'anai haa'i mareho ta'a'i? 'Anai ha'atahiai noni ma'ua 'anai ha'amaesia?" Ai'a ta ta'i 'iniraaui nai aramia 'inia ta ta'i ha'atee.

5'Ia Jisas 'a wanasiraaui ma taesu'a di'u 'adaau suria rau ai'a ta'ahiai mwaeta'aasi. Rei'uaa na o'asi, 'a ahutotou ro'u suria na tahingadaau 'a baabau. Ma 'unua tanaai saesi, "O'i taranga'inia hura'ai rimamu." Mana 'oha na taranga'inia hura'a, na rimanai saesi 'agu goro aho'i. 6Ma na'i 'ohasi 'iraaui na Farisei raugu hura'a baaniai ruma ni ha'arahesi, rau 'ari beiraaui sae ana'ia Herod marau 'adoma'i sibasiba 'inia here he'ua na rai ngahua 'inia Jisas.

Kae Ruruhai Sae Na'i Kae Bwerai Galili

7'Ia Jisas miraaui rongoiusuri ana'i rau dioi bobonai kae bwera i Galili. 'A ragoi sae ra suriraaui baani'i 'omaa na'i Provensi Galili mana Jiudea mana 'Idumea, 8mana kae 'omaai Jerusalem ma tara'i 'omaa na'i aba bo ara'a 'inia

wai Jordan ma ra'i 'omaa gaarangiai 'omaai Taea mana Saedon. 'Iraau mwani sae 'isi ra boi beia Jisas 'iniaia rongo'i adaa'i taha 'iia na haa'i. ⁹Ma 'iniaia rago di'u anai sae, 'ia Jisas 'a o'ani 'iniraau rongoiusuri ana'i, "Moi ha'aagau 'inia ta ora tanaau. 'A gasi 'idi marai ragoi sae maragu haisu'isu'i di'u." ¹⁰A ragoi nei ra daoha nara heisu'usu'u 'ari wou beia Jisas 'anai hatariai abena, 'inia ra re'i'i mwani sae na 'ia Jisas 'a bwane ha'agorohi'i'a aho'i. ¹¹Ma ra'i nei na adaro 'a bwaunira ra boi beia Jisas. Ra topira'i ruru dioi ano tanaa Jisas ma ra awara, "I'oe na garena God!" ¹²Mia Jisas 'a ha'atee wetewete, 'a ha'abasuraaui adaro 'isi ma o'ani, "Abu ha'a-'irararaui sae do 'inau atei!"

**Jisas 'A 'Ome Sigihiai Waira Ta'i
Tangahuru Mana Rua Ha'ataari**
(*Matiu 10:1-4; Luk 6:12-16*)

¹³Mia Jisas 'a ta'eha na'i hungahunga ma 'unuraui nei na 'irisirau 'anai tau'aro beia. Mana 'oha rau boi beia, ¹⁴'a sigihiai waira ta'i tangahuru mana rua ma ha'a-atadaau 'iniaia Ha'ataari. Mia Jisas 'a ha'atee tanaraau o'ani, "Au 'ome sigihia'amu 'anai awa beiau ma wai ha'ataari'amu hura'a 'anai hadanga'ini'i ha'atee ana'ia God, ¹⁵ma moigui to'oraai mena 'anai taari'i adaro." ¹⁶Nara 'ini atadaa'i waira ta'i tangahuru mana rua 'ia Jisas na 'ome sigihirau:

- Saemon, mo'o na 'ia Jisas 'a ha'a-atania ro'u 'inia Pita;
- ¹⁷mea Jems mea Jon rua garena Sebedi, waira rua na 'ia Jisas 'a
 'unuraru 'iniaia Boanejis ma'ua Sae ni Hita, 'inia raru matai taesu'a
 mwada'u;
- ¹⁸mea Andru,
 Pilip,
 Batolomiu,
 Matiu,
 Tomas,
 mea Jems garena Alfias,
 mea Tadias,
 mea Saemon, baaniai ruruha ra raba taaria hura'ai gaumani ni Rom,
- ¹⁹mea Jiudas Iskariot, 'ia mo'o na usuha'inia Jisas tanaraui
 maerongana'i.

**Jisas 'A To'oraai Mena
Na Wetewete Di'ua Saetan**
(*Matiu 12:22-32; Luk 11:14-23; 12:10*)

²⁰Mia Jisas 'a aho'i 'ari ruma ana. Ma na'i ro'u i 'ohasi, 'a ragoi sae ra rurugoni mai beia. Mana rago di'u 'anai sae, 'ia Jisas mana rongoiusuri ana'i rau bwarabwara'a di'u marau ai'a to'o madoraa 'anai ngau ma'ua haa'i tara'i maho he'ete'i ro'u. ²¹Oha 'iraui do'orana'i mana inana Jisas rau rongo'i maho 'isi, rau 'ari wou 'anai waia 'ari ruma adaaui. 'Inia tara'i sae rau 'unua do ai'a odo-odo i 'adoma'ina.

22Hoita, ma tara'i Ha'ausuri 'anai Ringe ana'ia Moses narau boi baaniai Jerusalem, rau awa ro'u marau ha'atee o'ani, "Na mwaeraha adaau'i adaro, 'ia Saetan, † 'a bwaunia Jisas. 'Iia na haa tanaai mena 'anai taari'i hura'ai adaro baaniraau'i sae."

23Mia Jisas 'a soiraau mai sae 'anai boi gaarangia, ma haa'i ha'atee heiha'auu 'anai ha'ausuriraau, 'a o'ani, "A 'ua? Mou 'adoma'inia do'ia Saetan 'ai matai taaria hura'a haaria? 'A bwara! 24'Onaa 'e kantri na 'iraau'i sae ra hei'oi hairiu, na kantrisi 'a bwa'i ura. 25Ma 'onaa 'e ta'i ruruha na'i ruma ra awa heheihoa'a moi, na ruruhasi 'a bwa'i ura ro'u. 26Hoita, 'onaa ruruha ana Saetan rai awa heheihoa'a, 'a o'asi ro'u. 'A bwa'i ura mwada'u, ma'ai ahoda mai ai'aa."

27Mia Jisas 'a haa ro'u i ha'atee heiha'auu. 'A ha'atee o'ani, "Onaa 'e nei na raba taari'i hura'ai adaro, 'ai wetewete ma'ata di'ua Saetan. 'A 'onaa sae na raba sirihiai ruma anai sae wetewete 'anai haa'i maho ana'i, 'ai wetewete ma'ata di'ua ro'u i sae wetewetesi. Naasi 'aigu mwada'u tanaa 'anai siri tosi'ai saesi, maigui haa'i bori ana'i.

28"‘Inau wai 'unua ha'a-momori tana'amou. 'Ia God 'a matai 'adoma'i nugasi'i moi mwane ora-ora'a na sae 'a haa'i mana mwane maho ta'a'i na 'unu'i 'inia God. 29Ma'ata 'ia tei nai ha'atee ha'ata'ai ai Hi'ona Maea, 'ia God 'a bwa'i 'adoma'i nugasia 'inia. Ni ora-ora'asi 'ai awa tarau beia." 30'Ia Jisas 'a 'unua o'asi tanaraau 'inia tara'i nei 'iniraau'i Ha'ausuri 'anai Ringe ana'ia Moses ra 'unua do'e adaro na bwaunia, naia na to'o mena 'inia 'anai taari'i hura'ai adaro. Ai'a do 'inia'i mena ana Hi'ona Maea.

Huunai Inana Mana Do'orana Jisas

(Matiu 12:46-50; Luk 8:19-21)

31Mana inana Jisas miraa'u do'orana'i rau ataha mai na'i ruma na 'ia Jisas 'a awa iei. Marau rau moi hura'ai abau 'omaa. Maraugu ha'ataaria siri taroha tanaa Jisas do'ai hura'a. 32Me na'i 'ohasi, 'a ragoi sae na rau heinagu garigaria Jisas marau o'ani 'inia, "‘Ei, 'ia inamu miraaui do'oramui, neiraau hura'asi. Rau raba re'i'o."

33'Ia Jisas 'a ha'atee o'ani 'iniraau, "‘Iatei inagu miraaui tei do'oragu'i?" 34Mia Jisas 'a wanasiraau hairiui sae ra heinagu garigaria. Maagu ha'atee o'ani, "‘Ome! Neiraau'i inagu mana do'oragu'i! 35'Ia tei na hauai taha God na 'irisia do 'ai haa, naasi huunai do'oragu mana asigu mana inagu."

Mamaani 'inia'i Sae Na Rarasa

(Matiu 13:1-9; Luk 8:4-8)

4 1Mia Jisas 'a taraawa'a ha'ausuriraau ro'u i sae na'i bobonai kae bwera i Galili. Me suriai rago 'anai sae nara goni na'i dorasi, 'ia Jisas 'a heinagu ara'a na'i ora ma ta'e hura'a baaniai one. Me 'iraau'i sae ra ura moi one 'anai bahurongoa. 2Ma haa'i ha'atee heiha'auu 'anai ha'ausuriraau. 'Agu ha'atee

3:22 Saetan: Na'i ha'atee ni Grik ra 'unua Saetan 'inia Belsabul.

o'ani 'iniraa, ³“Moi bahurongo goro. 'E 'oha na 'e ta'i sae na hura'a 'anai hasi korai wiit na'i mou ana. ⁴Ma na'i 'oha na rarasanga'ini'i kora, ra'i nei nara to'o na'i tara mana gere manu ra dio mara ngaa'i. ⁵Tara'i nei ra to'o na'i dora hauhau'a, dora na ano 'a ai'a raha mara tahi'a. Mana 'oha ra tahi, ra tahi goro ga'u moi. ⁶Mana 'oha na sina 'a raorao di'u, ra nugu mara mae aho'i moi, 'inia raridi ra ai'a ganu dio. ⁷Ma tara'i kora ra to'o na'i dora ra tahi bei'i waroraraki. Ma na'i 'oha ra tahi ara'a, na waroraraki 'a agu ha'amaesi'i maragu ai'a hungu'a. ⁸Mana kora ra to'o na'i ano goro, ra tahi goro mara hungu. Tara'i nei ra'i ta'i oru tangahuru hua, tara'i nei ra'i ono tangahuru, ma tara'i nei ra'i 'arangi. ⁹Tei na to'o karinga 'anai rongo 'ai bahurongoa mai aidangi tarihana.”

**'Ado'adona Jisas 'Anai Ha'ausuri
'Ini'i Ha'atee Heiha'auu**

(Matiu 13:10-17; Luk 8:9-10)

¹⁰Oha na awa haaria Jisas, 'iraa na ta'i tangahuru mana rua rongoiusuri ana ma tara'i sae ro'u beiraa, rau boi marau songa'inia 'ini'i 'ado'ado 'ada'i mamaani 'isi. ¹¹Mia Jisas 'a ha'atee o'ani 'iniraa, “Na'i na'o, 'ia God ai'a ha'arangasia he'uai marungiraa nai haa i noni ana'i. Me na'i 'ohani 'a ha'ata'inia tana'amou. Mei tanaraaui nei nara ai'a hinihinia God, wai ha'ausuriraa moi suri'i ha'atee heiha'auu. ¹²Au haua o'asi do,

‘Rei'uaa rai 'ome marai 'ome
marau bwa'i 'ome 'iraraa ta maho,
ma'ua rai bahurongo marai bahurongo
marau bwa'i aidangisia ta maho.
Ma 'onaa rai 'ome 'iraraa marai aidangisia,
rau ga'i rihosi,
mea God 'ai 'adoma'i nugasi'araau.’”†

'Ado'ado 'Anai Nei Na Rarasa

(Matiu 13:18-23; Luk 8:11-15)

¹³Mia Jisas 'a songa'iniraa ro'u o'ani, “A 'ua? Mou ai'a aidangisiai ha'atee heiha'auusi? 'Onaa mou ai'a, 'ai he'ua namoigu aidangisi'i ro'u 'ini'i tara'i heiha'auu na wai maani'i ro'u? ¹⁴Hoita, 'i nei na rarsa kora 'a 'onaai sae na taroha'ini'i ha'atee ana'ia God tanaraaui sae. ¹⁵Na kora ra to'o suriai tara nara ngaa'i manu, 'a ura 'iniraaui sae ra rongo'i moi ha'atee. Mia Saetan 'a boi ma ha'akaku'araau aho'i 'ini'i. ¹⁶Na kora ra to'o na'i ano hauhau'a 'a ura 'iniraaui sae ra rongo'i mara daa'i raurau i ha'atee ha'i wa'ewa'e. ¹⁷Mara ai'a daa'i orea 'inia na ha'atee ra ai'a ganu dio na'i tahingadaa'i 'onaai hasi'ei ra ai'a ganu i raridi. 'Oha na mwani maho ra bwara mara ha'a-mama'airaa 'ini suri'i adaa'i ha'atee ana'ia God, raugu rihota'i aho'i. ¹⁸Na kora ra to'o na'i dora ra awa iei waro raraki 'a ura 'iniraaui sae ra rongo'i ha'atee ana'ia God. ¹⁹Ma 'ari wou maraagu 'adoma'i raha moi 'ini'i taraani

maho. Mara ta'ahi'i ro'u i toto'ora ni marewana, mana taraani maho ni marewana moi. Tarana naasi, na ha'atee 'a bwa'i matai tahi ma ai'a ha'i hua. ²⁰Mana kora ra to'o na'i ano goro, 'a ura 'iniraaui sae ra rongo'i ha'atee ana'ia God marau huunai hinihini'i. Mana mwane maho goro ra hura'a baani'i tahingadaa'i 'onaai hungu goro ra hahaa'i hasi'ei. Tara'i nei ra'i oru tangahuru hua, tara'i nei ra'i ono tangahuru, ma tara'i nei ra'i ta'i 'arangi.”

Maho Nara Bainihu Ga'u,

Rai Ha'ata'i Hura'a

(Luk 8:16-18)

²¹Ia Jisas 'a ha'atee o'ani ro'u 'iniraaui, “A 'ua? Ta sae 'a gal'i suungia ta raita 'anai nugaa moi na'i bahainai rabo'o ma'ua na'i bahainai bwea? 'A bwa'i! 'Iia 'ai tokia ma'ata'a na'i dora 'ana. ²²Taha na awa bainihu 'ai ha'ata'i hura'a. ²³Tei na to'o karinga 'anai rongo 'ai bahurongoa mai aidangi tarihana.”

²⁴Mia Jisas 'a ha'atee o'ani ro'u 'iniraaui, “Moi wai'ado'ado goro suri'i maho nau maani'i tana'amou. 'Ia God 'ai haua tana'amou aidangi suriai araisuri'i amoo'i taha nau 'unu'i. ²⁵Ia tei na raba aidangisia God, 'ia God 'ai a'oi'a tanaai aidangi na to'oraa. Mia mo'o na ai'a raba aidangisia God, na gere aidangi na to'oraa, 'ia God 'ai rahia baania.”

God Moi Na Matai Ha'a-urasiai

Heimarungi Ana

²⁶Mia Jisas 'a haa ro'u i ha'atee heiha'auu, “Na heimarungi ana God 'a 'onaai kora na sae 'a rarasa-nga'ini'i na'i moou ana nara tahi haari'i. ²⁷Saesi 'a mauru na'i rodo, 'a rarai na'i dangi ma poru haa'i tagora ana'i. 'Ado dangi 'a haua o'asi moe'a. Ma na'i 'ohasi, na kora ra raboa mara tahi ara'a. Mia mo'osi 'a ai'a 'iraraai taha na ha'atahi'i kora 'isi. ²⁸Hoita, naia na ano na ha'atahi'i 'isi na ragu hungu 'ini'isi. Na maho tahamora na re'ia, naasi rawadi, ruana tagadi mana oruna nai'i huadi. ²⁹Mana 'oha na hua ra maua, 'a hauai naihi ana ma tabari'i, 'inia 'a tari'ai madoraa 'anai haa'i.”

Raha Nai Hauai Heimarungi Ana God

(Matiu 13:31-32; Luk 13:18-19)

³⁰Mia Jisas 'a songa'iniraaui ro'u o'ani, “A he'uai 'adoma'imooi 'iniaai heimarungi ana God? 'E taha wai heiha'auu 'inia na moi aidangisia 'inia? ³¹'Io, 'a 'onaai koranai hasi'ei ra 'unua 'iniaai mastad nara hasia na'i mou. Na koranai hasi'eisi 'a kekerei di'u'i koradi mwane hasi'ei. ³²Ma na'i 'oha na tahi ara'a, 'e kae hasi'ei na raha di'u'i hakoi maho ra hasi'i na'i mousi, mana raraana ra raha 'ohadi manu 'anai nu'i suri'i.”

'Ado'adona Jisas 'Anai Ha'ausuri

'Ini'i Ha'atee Heiha'auu

(Matiu 13:34)

³³Ia Jisas 'a haa'i tanaraaui inoni ha'ausuringa'i na rau matai aidangisi'i. ³⁴'A haa'i moi suri'i ha'atee heiha'auu. Ma na'i 'oha nai awa haaria beiraui rongoiusuri ana'i 'aigui ha'atee wagasi'i tanaraau.

Jisas 'A Ha'apapakuai Ro'a Mana Tabaosi*(Matiu 8:23-27; Luk 8:22-25)*

35Na'i dangisi, 'oha na gaarangi su'urahi, 'ia Jisas 'a ha'atee o'ani 'iniraau rongoiusuri ana'i, "Gau magai 'ari nata batarau i bwera." 36Miraau rongoiusuri ana'i rau hano baaniraau inoni 'isi. Rau ta'e ara'a na'i ora na 'ia Jisas na heinagu iei marau ta'i 'ari nata batarau. Ma tara'i ora ro'u narau ta'i 'ari goni. 37Raugu 'asu'a marau hano suaai kae ro'a beiai tabaosi. Mana ora narau ta'e iei 'a gaarangi mai dodo 'inia ni tabaosi ra abwao aharau siri na'i raronai ora. 38Na'i 'ohasi 'ia Jisas 'a borunga na'i pilo auru na'i muri, 'a poru mauru. Miraau rongoiusuri ana'i rau ha'araia marau o'ani 'inia, "Ha'ausuri, 'a ai'a ta'aabemu 'inia gaarangi dodo'a agauni?"

39'Ia Jisas 'a ura ara'a ma ha'atee wetewete o'ani tanaai ro'a mana wai, "Papaku!" Ma na'i mau 'ohasi na ro'a 'a papaku mana wai 'agu biowaa.

40'Ia Jisas 'agu songa'iniraau rongoiusuri ana'i, "Ni 'uaana mou mamaa'u 'inia? 'A 'ua? Mou ai'a hinihiniau mau?"

41Na'i 'ohasi rau mamaa'u ro'u wou baaniai na'o marau ha'atee hairiu o'ani, "E sae he'ua naani? Rei'uaa ro'a mana tabaosi mara araisuria moi!"

Ra'i Adaro Nara Bwaunia Sae*(Matiu 8:28-34; Luk 8:26-39)*

5 1'Ia Jisas miraau rongoiusuri ana'i rau taha wou na'i nata batarau i bwera i Galili marau 'oto na'i dora ra 'unua 'inia Gerasa. 2-3Ma na'i 'oha rau dio baaniai ora, 'e sae na adaro 'a bwaunia 'a boi 'anai heisadoi beia Jisas. Saesi 'agu hura'a mai baaniai dora na awa iei, suri'i wabwa nara toringi'i ei sae mae. Me 'inia wetewete di'u ana, rei'uaa ra ho'osia 'ini'i arihau mara ai'a bwera tanaai mosi'i. 4'A ragoi 'oha ra ho'osiai uwana mana rimana 'ini'i arihau ma momosi'i moi. Ma ai'a ta sae ro'u 'ai wetewete 'anai ha'amanataa. 5Dangi mana rodo 'a hano hairiu suri'i wabwa mana hungahunga. 'A awaawara ma ha'amaaraai abena 'ini'i hau.

6Hoita, saesi 'a bwane re'ia mau hura'a Jisas sisiri mai adaa ma bwane 'eba 'anai heisadoi beia. 'A taha wou beia ma topira'i ruru tanaa. 7-8Mia Jisas 'a ha'atee o'ani, "Adaro, 'oi hura'a baaniai saeni!" Mana saesi 'agu awara raha o'ani, "Ei Jisas, garena God ororiu ara'a! 'O raba 'uaauni? Na'i atana God 'au ha'angoni'o, 'oi abui ha'a-mama'aiau!"

9Mia Jisas 'a songa'inia saesi, "Iatei atamu?"

Mia aramia, 'a o'ani, "Atagu 'ia Kae Ruruha, 'inia meu rago di'u." 10Mia ha'angonia wetewete a Jisas do 'ai abui taarirau hura'a baaniai dorasi.

11Ma na'i bobonai abaaba gaarangirau, ra'i mwane boo nara suasua 'isi. 12Miraau adaro 'isi ra bonga'inia Jisas o'ani, "O'i ha'ataari'ameu siri suri'i boo 'isi 'anai awa suri'i." 13Mia Jisas 'a ha'awaterau mana adaro 'isi ra hura'a baaniai saesi mara siri'a suri'i mwani boo 'isi. Mana boo 'isi ra 'eba dio suriai ahana mara rege dio na'i wai mara dodo hako.

14Miraau nei ra 'omesuri'i boo 'isi rau 'eba 'ari na'i 'omaa ma na'i suri'i mwani dora ro'u 'anai taroha'inia tarohasi. Mana mwani sae hako ra boi

'anai 'omesiai maho na to'o. ¹⁵Mana 'oha ra boi beia Jisas, ra re'iai sae na adaro ra bwaunia ga'u. 'A goro'a mana aidangina 'a odo-odo aho'i ma ho'o bwana'a, 'a heinagu papaku moi. Miraau sae ra maaa'u hako. ¹⁶Miraau nei rau re'i'i maho 'isi, rau maania 'ari taha na to'o tanaa saesi mana boo 'isi. ¹⁷Miraau saenai dorasi rau bongal'inia Jisas do'ai hura'a baaniai dora adaau.

¹⁸'Oha 'ia Jisas 'a ta'e aho'i na'i ora, na sae na adaro ra bwaunia ga'u ani 'a ha'angonia wetewete do rarui ta'i hano.

¹⁹Mia Jisas 'a ha'atee o'ani 'inia saesi, "Au ai'a rabasia do'oi hano beiau, ma'ata 'oi 'ari 'omaa amua beiraau sae amu'i. Ma'oi 'unua tanaraau taha 'ia Araha God na haua tana'o mana heita'ahi ana tana'o." ²⁰Naasi mana saesi 'a hura'a ma 'ari na'i Provensi Dekapolis. 'A maania tanaraau hakoi mwani sae taha na 'ia Jisas 'a haua tanaa mana mwani sae 'isi ra heimwaota'i di'u 'inia.

**'E Gare Urao Ana Jaeras
Mana Urao Na Adoiai 'Abu Raha**

(Matiu 9:18-26; Luk 8:40-56)

²¹'Ia Jisas miraau rongoiusuri ana'i rau ta'e aho'i 'ari nata aba 'iniai bwera i Galili. 'Oha na siri wou na'i one, 'a ragoi sae ra rurugoni mai beia. ²²Ma'e sae na boi 'anai re'ia Jisas na atana 'ia Jaeras. 'Iiasi 'e na'otara na'i ruma ni ha'arahesi 'anai 'omaasi. 'A boi ma topiruru auru tanaa Jisas. ²³'A ha'angonia wetewete, 'a ha'atee o'ani, "Jisas, ni gare urao agua 'a gaarangi mae'a. 'Oi boi karohia maai goro aho'i." ²⁴Mia Jisas 'agu hano beia Jaeras 'anai 'ari ruma ana. Ma'e kae ruruhai sae ra hano haisuri mara ha'asu'isu'ia.

²⁵Ma na'i ruruhasi, 'e urao na awa iei na adoiai 'abu raha, ma'e ta'i tangahuru mana rua harisi na hako'a. ²⁶'A rongomaata'i di'u suri'i 'oha 'irraui dokita ra bonasiai ha'ahakoa baania i daohasi. Mana uraosi ai'a gere goro moe'a, 'agu daoha raha di'u wou. Mana gere ha'a ana'i ra hako mamata 'inia tahariraa. ²⁷Na uraosi 'a bwane rongoi taroha 'inia Jisas. Naasi ma 'ariwou na'i murina na'i 'uruhanai kae ruruhasi ma karohiai to'oni ana. ²⁸'A 'iraraa haaria do 'onaa 'ai karohia moi to'oni ana Jisas ma 'a ga'i goro aho'i baaniai daoha na adoiasi. ²⁹Ma na'i 'oha na karohia na 'abu 'a papaku ma arunga 'iraraa do 'iia 'a goro'a. ³⁰Ma na'i ro'u 'ohasi, 'ia Jisas 'a 'iraraa do ni mena ni ha'atahi 'a hura'a baania. Ma rihota'i ma songal'iniraaui mwane sae 'isi o'ani, "Ia tei 'ini'amou na karohiai to'oni agua?"

³¹Miraau rongoiusuri ana'i rau ha'atee o'ani 'inia, "A 'ua na'o songal'inia 'inia mo'o na karohiai to'oni amuasi? 'A bwarai 'iraraa tei na karohi'o! 'O ai'a 'iraraai rago anai sae na ra ha'a-su'isu'i'osi?"

³²Mia Jisas 'a wanawana hairiu 'anai re'ia tei na karohiai to'oni ana. ³³Mana uraosi 'a 'iraraai maho na to'o tanaa. 'A boi ha'i-'idi'idi 'inia 'a maaa'u, 'a topira'i ruru auru tanaa Jisas ma maania hako tanaa daoha na sadoia ma 'inia ro'u i karohia anai to'oni ana. ³⁴Mia Jisas 'a ha'atee o'ani 'inia uraosi, "Ina, i hinihinimu na ha'agorohi'o aho'i! 'O bwa'i rongomaata'i'a. 'Oi 'ariwou dadara'a!"

³⁵Na'i 'oha na 'ia Jisas 'a ha-hadahada mau, ra'i sae ra boi baaniai ruma ana Jaeras marau o'ani 'inia Jaeras, “Ni gare amua 'a hako'a. 'Oigu abu 'unua'ai ha'ausurisi 'anai 'ari!”

³⁶Ia Jisas 'a rongo'i mareho narau maani'isi ma o'ani 'inia Jaeras, “Oi abui maaa'u, 'oi hinihini moi!”

³⁷Ia Jisas 'a ai'a rabasia do tanei ro'u 'anai hano beia, ma'ata 'ia moia Pita, 'ia Jems, mea Jon do'orana Jems. ³⁸Rau 'ari wou ruma ana Jaeras marau rongoraau sae nara boi 'anai ada'imae 'inia' garesi. ³⁹Na'i 'oha 'ia Jisas 'a siriwou na'i ruma 'a ha'atee o'ani 'iniraau, “Ni 'uaana namou ang'i 'inia? Na garesi ai'a mae, 'iia 'a mauru moi.” ⁴⁰Mana mwane sae hako ra da'ata'inia Jisas. 'Ia Jisas 'a 'unua tanaraau mwane sae 'isi do rai hura'a baaniai ruma. Maagu wairaruai amana mana inanai garesi, beiraau oru rongoiusuri anasi marau 'ari na'i ahii na awa iei garesi. ⁴¹⁻⁴²Mia Jisas 'a dau na'i rimana'i garesi ma ha'atee o'ani na'i ha'atee ana, “Talitha, koum!” I 'ado'ado 'anai ha'ateesi 'a o'ani, “Gere urao, suruta'e!” Ma na'i moi 'ohasi, na garesi 'a suruta'e magu hahano. Miraau hako rau heimwaota'i di'u. ⁴³Ia Jisas 'a ha'atee wetewete tanaraau do rai abui taroha'inia ro'u tanaa ta nei 'inia mahosi. Ma ha'atee o'ani, “Moi haua tanaa ta mahoingau.” Mana gare uraosi, ni harisina 'e ta'i tangahuru mana rua.

Ra 'Utaia Jisas Na'i 'Omaai Nasaret

(*Matiu 13:53-58; Luk 4:16-30*)

6 ¹Ia Jisas 'a hura'a baaniai 'omaasi bei'i rongoiusuri ana'i marau 'ari Nasaret, 'omaa na raha ara'a iei. ²Ma na'i dangi ni mamaro 'a siri na'i ruma ni ha'arahesi ma ha'ausurirai noni. Ma ragoi noni ra goni mai 'anai bahurongoa. Ma na'i 'oha ra rongo'i ha'ausuringa'i ana'i, rau heimwaota'i di'u maraugu ha'atee heiheia o'ani, “Romwane! 'A he'ua na 'irara'i 'ini'i maho 'inia mo'osi? 'E sae haaria moi na'i 'omaani naasi, ma 'a he'ua na aidangi di'u 'iniasi? Ma to'oraa he'uai mena na haa'i 'ini'i ha'abu'oahu 'isi? ³'Iia 'e kapentaa moi, gare ana Meri, do'oradaau a Jems, Josep, Jiudas mea Saemon. Me 'iraaui asina'i rau awa ro'u moi 'ini.”

Naasi rau 'itaa Jisas marau ai'a raba hinihinia.

⁴Mia Jisas 'a ha'atee o'ani 'iniraau, “I rarabea ra ha'ahoua suri'i mwani dora hako. Na'i moi 'omaa ana miraaui sae ana'i naraugu ai'a.” ⁵Ma 'ini ai'a hinihinia adaau a Jisas, ai'a ragoi ha'abu'oahu na haa'i na'i 'omaasi. Mia nugaai rimana moi hungadaau taringai nei ra daoha mara goro aho'i baani'i daoha nara sadoira. ⁶Ia Jisas 'agu heimwaota'i di'u 'iniraau sae na'i 'omaa ana, 'inia rau ai'a hinihinia.

Jisas 'A Ha'ataariraa Hura'a Ta'i Tangahuru

Mana Rua Ha'ataari Ana

(*Matiu 10:5-15; Luk 9:1-6*)

Ma na'i muri, 'ia Jisas 'a hano hairiu suri'i 'omaa 'anai ha'ausurirai noni. ⁷Ma'e ta'i 'oha, 'a soiraaui goni ta'i tangahuru mana rua rongoiusuri ana.

Ma ha'atee o'ani 'iniraa, “E waira rua ma wai ha'ataaria hura'a 'ari suri'i 'omaa. Ma wai haa tana'amoui mena 'anai taari'i hura'ai adaro baanirai sae. ⁸Na'i 'oha moi hura'a, abu tanei 'ini'amou 'ai waa ta huai bredi ma'ua anga ni 'aariha, ma'ua ha'a. Moi matai waa'i 'a'abi amoo'i ⁹mamoi siri suri'i sandol amoo'i. Ma'ata mou abui waa'a ro'u ta to'oni. ¹⁰Oha moi siri wou na'i ruma nara ha'a-maoto'amou na'iei, moi awa hatara'i na'iei tari 'oha moi hura'a baaniai dorasi. ¹¹Mana 'oha moi taha wou ta dora na rau bwa'i raba ha'amaoto'amou mana rongo'i taha mou hadanga'ini'i, moi hura'a baaniai 'omaasi. Ma moi tarohi'i kahua baani'i uwamoo'i, 'e ha'abasu tanaraau do'ia God 'ai ha'a-mama'airaa.”

¹²Me 'iraau rongoiusuri rau hura'a marau taroha'iniai ha'atee ana God tanaraau mwane sae, rau o'ani, “Mou rihosi baani'i ora-ora'amoo'i.”

¹³Marau taari'i hura'a mwani adaro marau tarohiraa mwani nei ra daoha 'iniai rumu mara goro aho'i baani'i daoha nara sadoira.

Na Mae Na Haa Jon Bwareomaea

(Matiu 4:1-12; Luk 9:7-9)

¹⁴Na'i 'ohasi, 'ia Herod Antipas na Mweraha na'i Galili, 'a rongo'i mwani taroha 'ini'i taha 'ia Jisas mana rongoiusuri ana'i rau haa'i. 'Inia na taroha 'a 'adarara hako 'ari suriai mwane dora. Tara'i sae ra 'unua do 'ia Jisas naasi 'ia Jon Bwareomaea na tahi aho'i baaniai mae. 'Inia do naia na to'o mena 'inia 'anai haa'i ha'abu'oahu. ¹⁵Ma tara'i nei ro'u ra 'adoma'inia do 'ia Elaija ma'ua 'e ta'i 'iniraaui Rarabea ni 'ohaani mau. ¹⁶Ma na'i 'oha 'ia Herod 'a rongo'i maho ra 'unul'i 'inia Jisas, 'a o'ani, “‘Ia Jon Bwareomaea nara horosia'ai 'u'una ani, na suruta'e aho'i baaniai maesi.”

¹⁷⁻²⁰'Inia na'i na'o, 'ia Herodias raru ha'iwai a Pilip, do'orana Herod. 'A 'ari wou mia Herod 'agu asihura moi ma waina'a Herodias. Naasi 'ia Jon Bwareomaea 'a taringai 'unua tanaa Herod do 'a ai'a odo-odo do'ai wainai urao ana do'orana!

Hoita, mia Herodias 'a taesu'a di'u 'ana Jon ma raba ngahuia maagu bwara tanaa. 'Inia 'ia Herod 'a maguguta'i ngahuia 'inia 'a 'iraraa do 'ia Jon 'e sae na maea ma odo-odo na'i maana God. Naasi 'ia Herod 'a 'unua tanaraau sae hehei'oi do rai waia Jon marai nugaa na'i rumanih'o, 'inia 'a raba ha'atahia baania Herodias. 'Ia Herod 'a wa'ewa'e 'oha na bahurongo'i mamaani na haa'i a Jon, rei'uaa na ha'a-heingahui'i maho 'isi na'i 'adoma'ina.

²¹'E ta'i 'oha, 'ia Herod 'a hauai kae ngaungau 'anai 'adoma'i aho'isiai 'oha na huta. Ma ari'ahuraa hako mai saemau ana'i, 'iraau na'otara na'i ruruhai hehei'oi, miraaui hako na'otara na'i Galili. Na'i 'ohasi, 'ia Herodias 'agu sadoiai 'oha goro 'anai ngahuia Jon. ²²Na'i 'oha na to'o i ngaungau, 'e gere urao, garena Herodias, 'a siri mai mao 'anai ha'a-reirei'araau. Mia Herod miraaui hako sae na'i rumasi rau wa'ewa'e 'anai reireia. Mia Herod 'agu o'ani 'iniai gere uraosi, “Wai haua tana'o namoiwou ta mareho 'oi 'irisia. ²³Wai duruduru tana'o 'inia ta aba 'iniai dora nau marungia 'onaa 'o 'irisia.”

24Mana gere uraosi 'a hura'a, ma 'ari songa'inia inana, 'a o'ani, “Nanae, 'e taha wai ha'angonia?”

Mana inana 'a o'ani, “Ni bwauna Jon Bwareomaea!”

25Mana gere urao 'a hasi hura'a ma 'ari aho'i beia Herod ma ha'atee o'ani, “I'Inau 'au rabasia do'oi haua'a mai tanaaui bwauna Jon Bwareomaea na'i ta rabo'o papaheta'a.”

26Na Mwaeraha 'a ahutotou di'u. Ma ha'a-heingahuia na'i 'ado'adona, 'inia 'a ai'a raba horosiai 'u'una Jon. Ma bwara'a ro'u tanaai ura bwarasiai taha na gere uraosi 'a ha'angonia na'i maadi sae rago. 27Naasi 'ia Herod 'a ha'ataarai sae hehei'oi moi 'ohasi 'ari rumanih'o 'anai horosiai 'u'una Jon. 28Mana sae hehei'oi 'a horosiai 'u'una, 'a nugaai bwauna na'i rabo'o papaheta'a ma haua tanaai gere urao, mana gere uraosi 'a waa 'ari tanaa inana.

29'Oha 'iraaui rongoiusuri ana'ia Jon ra rongoa, raugu boi waai abena marau nugaa na'i wabwa.

Jisas 'A Hanganiai Rima Merui Mwane

(Matiu 14:13-21; Luk 9:10-17; Jon 6:1-14)

30'Oha 'iraaui Ha'ataari rau aho'i mai baaniai 'aariha adaau, rau maani'i tanaa Jisas mwani maho rau haa'i mana mwani maho rau ha'ausuriraaui sae 'ini'i. 31Me 'inia rago anai sae nara boi beia Jisas ma ra aho'i, 'ia Jisas mana ha'ataari ana'i rau bwarabwara'a di'u marau ai'a to'o madoraa 'anai ngau mana haa'i tara'i maho he'ete'i ro'u. Mia Jisas 'a ha'atee o'ani 'iniraaui, “Gau ma gai 'ari ta dora na bwa'i ta sae nai awa na'iei ma gai gere mamaro ga'u.”

32Naasi, marau ta'e na'i ora, rau 'ari na'i dora na ai'a sae awa iei.

33Miraau sae rau 'irararaau'ai hano adaausi, marau hano baani'i 'omaa adaa'i. Rau 'eba hatare 'anai dora na 'ia Jisas mana rongoiusuri ana'i narau hano 'ana, marau ataha na'i na'o 'iniraaui. 34'Oha 'ia Jisas 'a dio baaniai ora, 'a re'iai kae ruruhai saesi ma ta'ahiraaui di'u, 'inia rau 'ome ha'a-ta'ata'ahi 'onaa'i siip nara ai'a to'o sae 'anai 'omesuri'i. Ma ragoi maho na ha'ausuriraaui 'ini'i.

35Ma su'urahi'a 'iraaui rongoiusuri ana'i rau boi beia marau o'ani 'inia, “A ore a di'u'a naani, mana dorani, 'a ai'a ruma'a. 36Ni 'uaana na'o ai'a ha'a-taariraaui sae 'ini marai hura'a suri'i 'omaa 'isi 'anai hori 'adaau mahoingau?”

37Mia Jisas 'a aramiraaui o'ani, “I'amou namoi ha'i 'adaau mahoingau!” Marau o'ani 'inia, “E taha na mei hanganiraaui 'inia? Horihorinai ta'i sae na'i ta'i harisi maigui arari 'anai hori bredi 'ada'i mwani sae 'ini!”

38'Ia Jisas 'a ha'atee o'ani 'iniraaui, “Moi sadoiai siha huai bredi na beiraaui sae 'isi.”

Mana 'oha rau 'iraraa, rau 'unua tanaa o'ani, “E rima gere huai bredi ma'e rua ii'a.”

39Mia Jisas 'a 'unua tanaraau rongoiusuri 'anai ha'a-heinaguraau sae na'i mwani hahaarisi marai hoairaaui suri'i ruruha. 40Miraau sae ra heinagu suri'i ruruha, tara'i ruruha ra'i ta'i 'arangi sae, ma tara'i nei rima tangahuru.

⁴¹Mia Jisas 'a dauai rima huai bredi mana rua ii'asi. 'A wana ara'ai aro ma ha'atee ha'agorohia God 'inia. Ma uubi'i bredi 'isi mana ii'a ma haa'i tanaraaui rongoiusuri ana'i 'anai ha'atora'ini'i tanaraaui sae.

⁴²'Iraau hako rau ngau masu ⁴³mana mahoingau narau ngau tahi'i rau si'o ha'ahonua 'inia'i ta'i tangahuru mana rua abira. ⁴⁴'A 'onaai rima merui saemwane narau ngau masu hako na'i dangisi.

Jisas 'A Hahano Na'i Hunganai Wai

(*Matiu 14:22-33; Jon 6:15-21*)

⁴⁵Na'i moi muri 'ia Jisas 'a o'ani 'iniraau rongoiusuri ana'i, “Moi ta'e na'i ora mamoi gaau na'i na'o 'ari nata batarau, mamoi siri na'i 'omaai Betsaeda. 'Inau wai awa ga'u.” Naasi mia Jisas 'a awa moi beiraaui sae 'isi tari 'oha na ha'ahanoriraaui aho'i hako 'ari suri'i 'omaa adaa'i. ⁴⁶'Oha na ha'a-taariraaui hakoi sae, 'a ta'eha na'i hungahunga 'anai ha'arahesi.

⁴⁷Ma su'urahi'a mia Jisas 'a awa mau na'i hungahunga mana rongoiusuri ana'i rau 'ari wou taha na'i 'ubutanai wai. ⁴⁸'Ia Jisas 'a re'iraau rongoiusuri ana'i do rau tau'aro raha di'u 'anai haruta suaai ro'a raha. 'Ari wou me 'ia 'a 'ari beiraaui na'i wa'aria, 'a hahano na'i hunganai wai ma gaarangi hano di'uraaui. ⁴⁹Ma na'i 'oha 'iraau rongoiusuri ana'i rau re'ia'i hahano ana Jisas na'i hunganai wai rau 'adoma'inia do 'e anoa marau awaawara. ⁵⁰Rau kae maaa'u di'u 'oha rau re'ia, mia Jisas 'a o'ani 'iniraau, “'Ai abui ta'abemoou! 'Inau moia Jisas na! Moi abui maaa'u.” ⁵¹Ma ta'e ara'a beiraaui na'i ora mana ro'a 'a papaku'a. Miraaui na rongoiusuri ra kakuta'aai ahudaa'i. ⁵²Ra pwapwakui 'adoma'idaa'i 'inia rau ai'a raroma-tarihana do'a to'o mena 'anai haa'i ha'abu'oahu, 'onaai 'oha na hanganiraaui ani rima merui mwane.

Jisas 'A Ha'agorohira Aho'i Sae

Ra Daoha Na'i Genesaret

(*Matiu 14:34-36*)

⁵³'Ia Jisas mana rongoiusuri ana'i rau haruta 'ari nata batarau marau 'oto na'i dora ra 'unua 'inia'i Genesaret marau ha'ahunaai ora adaau na'i 'isi. ⁵⁴'Oha rau dio baaniai ora, 'iraau sae ra 'ome 'iraraa Jisas. ⁵⁵Naasi, marau 'eba 'ari suri'i mwani 'omaa na'i dorasi marau taroha'inia'i boi ana Jisas. Marau suru'i'i sae ra daoha suri'i bwea marau waa'i 'ari na'i dora na 'ia Jisas 'ai taha suri'i. ⁵⁶Ta 'omaa he'ua nai 'ari ei, 'iraau sae ra waa'i mai moe'a i sae adaa'i nara daoha mara nuga gonii na'i ta'i dora a'ora. 'Iraau sae daoha rau bongaa'inia Jisas dorai karohia moi gaonai to'oni tewa ana. 'Iraau nei rau haua o'asi rau goro aho'i baani'i daoha ra to'iraau.

Ha'ausuringa'i Ni 'Oha Bwani

(*Matiu 15:1-9*)

7 ¹Tara'i Farisei mana Ha'ausuri 'anai Ringe ana'ia Moses nara boi baaniai Jerusalem, ra goni mai beia Jisas. ²Rau re'ia do tara'i rongoiusuri ana'ia Jisas rau ngau maraui ai'a dorima suriai herehere 'iraau Farisei rau 'unua.

3'Iraaui Jiu, ororiu 'iraau'i Farisei, ra suri'i mau i ringe adaa'i na'i 'oha bwani, 'onaai herehere 'ana'i dori ha'agorohi'i rimadaa'i maraigu ngau. 4'Ma na'i 'oha rai 'ari suri'i dora-ni-horihori mahoingau, ra bwa'i ngaa'i mahoingau rai hori'i tari 'oha rai hauai herehere 'ana'i dori ha'agorohi'i rimadaa'i. Marau suri'i ro'u tara'i ringe adaa'i, 'onaai here 'ana'i dori panikeni mana kuki mana rabo'o.

5'Hoita, miraau'i Farisei mana Ha'ausuri rau songa'inia o'ani a Jisas, "Ni 'uaana na'iraau'i rongoiusuri amu'i ra ai'a ha'isuri'i 'ini'i ha'ausuringa'i narau ha'adiohi'i mai tanagaau i wauwa agaa'i na'i 'oha bwani? 'I'ameu meu re'ia do rau ai'a suriai huunai herehere 'ana'i dorima, marau ngau moi!"

6'Mia Jisas 'a ha'atee o'ani 'iniraaui, "Mou pwapwaa'i! Maho na 'unu'ia God tanaa Aisaea 'ana'i usu'i 'iniraaui wauwa amoo'i ra to'i'amou ro'u. 'Ia Aisaea 'a usu 'oniaa,

'Iraaui noni 'ini ra ha'ahouau moi 'ini'i ngoodaa'i,
magu tahingadaa'i ra awa ha'atau di'u baaniau.

7'I ha'arahesi adaa'i ra 'ari pwaranga,
'inia rau orisi'i Ha'atora ana'ia God

'ini'i ha'ausuringa'i adaa'i haariraaui na inoni moi na haa'i.'"[†]

8'Mia Jisas 'a o'ani ro'u, "I'amou mou gagata'ini'i Ha'atora ana God, ma mou suri'i moi ha'ausuringa'i adaa'i noni. 9'Mou mataihere di'u 'ana'i gagata'iniai Ha'atora ana God 'ana'i suri'i moi ha'ausuringa'i amoo'i haarimoo. 10'Mou 'iraraa do 'ia Moses 'a bwane 'unua o'ani, 'Oi ha'ahoua amamu mea inamu' ma o'ani ro'u, 'Iatei na 'unu ha'ata'aia amana mea inana rai ha'amaesia.'"[†] 11'Me'imoo mou 'unua dona 'a odo-odo moi 'onaa ta sae 'ai o'ani 'inia inana mea amana, 'Ha'a-arohai'amurua, 'au ga'i 'a'auhimurua 'ini'i maho nau to'ora'i. Me 'au bwa'i 'a'auhimurua'a. Suria maho nau to'ora'i ra maea'a. 'Inia 'au bwane wate'i tanaa God.' 12'I'amou mou 'adoma'i ha'agorohia moi heresi! 13'Na'i 'oha mou ha'ausurirai noni 'ana'i haua o'asi, mou here 'onaa do ha'ausuringa'i amoo'i ra ororiu di'u'ai Ha'atee ana God. Mara rago ro'u i maho na mou here hiosi'i o'asi."

Taha Na Matai Ha'ado'o'aai Sae

(Matu 15:10-20)

14'Ia Jisas 'a soi goniraaui ro'u mai kae ruruhai sae ma o'ani 'iniraaui, "Moi bahurongo goro mamoi aidangisiai taha na wai 'unu'i. 15'Maho na siri na'i ngoonai sae, 'a ai'a ha'ado'o'aai sae na'i maana God. Naia na taha na hura'a baaniai ngoona na ha'ado'o'aa. 16'Tei na to'o karinga 'ana'i rongo 'ai bahurongoa mai aidangi tarihana."

17'Ia Jisas miraau'i rongoiusuri ana'i rau hano baaniraaui sae marau siri na'i ruma. Miraau'i rongoiusuri rau ha'angonia 'ana'i ha'a-aidangisiraaui 'iniai ha'atee heihauusi. 18'Mia Jisas 'a o'ani 'iniraaui, "Mwane! Mou ai'a aidangisia mau? Na 'adoma'imoo'i ra kahi 'inia? Mou ai'a 'iraraa dona

mahoingau na siri na'i ngoonai sae 'a ai'a ha'ado'o'aai sae na'i maana God? 19Suria na mareho naasi 'a ai'a siri na'i raromana, 'a siri moi na'i ngoona, ma dio na'i ahuna ma hura'a aho'i moi baaniai abena." 'Ia Jisas 'a ha'atee o'asi 'iniraaui ma dorai 'iraraa dona mwane mahoingau ra goro na'i maana God.

20Ma ha'atee o'ani ro'u 'iniraaui, "Ni taha na hura'a baaniai raromanai sae, naasi na ha'ado'o'aa na'i maana God. 21'Inia na'i raromanai sae nara hura'a i 'adoma'i ta'a'i, 'onaai wawaasua'a, taritari'a beiai nata nei, heingahu mana beri, 22hairaurau, haa'i maho ta'a'i mana pwapwaa'i, 'adoma'i sisiwa 'inia nata nei, hai'ubwani, 'unu ha'ata'aia nata nei, ha'a-ta'eta'e mana here to'o bweubweu'a. 23Nara 'isi mareho nara ha'ado'o'aai noni na'i maana God. 'Inia ni mareho 'isi ra hura'a mai baaniai raromanai inoni."

'E Urao Na Ai'a Jiu Na Hinihinia Jisas

(*Matu 15:21-28*)

24Mia Jisas 'a hano baaniai dorasi, 'a 'ari suri'i 'omaa gaarangiai kae 'omaai Taea. Ma 'ari wou na'i 'omaa ma siri na'i ruma 'inia 'a ai'a rabasia do 'iraui sae rai 'iraraa. Ma rei'uaa na o'asi, 'iraui sae rau 'iraraa moi do'a awa 'isi. 25-26Ma'e urao na rongoai dora na awa iei a Jisas. Uraosi ai'a urao ni Israel, 'iia 'a huta na'i Ponisia, 'e aba 'iniai kantri ra 'unua 'iniai Siria. 'A 'ari beia Jisas 'inia na adaro 'a bwaunia'i gare urao ana. 'A 'ari wou beia ma topiruru ma mwaoro dio na'i ano. Ma ha'angonia wetewetea Jisas 'anai taaria hura'ai adaro baaniai gare ana. 27Mia Jisas 'a ha'atee heiha'auu o'ani, "Ni gare narai hangani'i na'i na'o. 'A ai'a goro dorai hau'i mahoingau adaa'i gare ma do raigui gaasi'i 'ada'i misu."†

28Mana uraosi 'a o'ani 'inia, "Ha'amomori di'u Araha! Ma'ata na misu ra matai ngaa'i ro'u moi mamamo i mahoingau adaa'i gare na rau ahoda baaniai dora ngaungau."

29Mia Jisas 'a o'ani 'inia, "Iniai heiarami odo-odo amua, na adaro 'a nugasia'ai gare amua. 'Oi aho'i 'ari 'omaa." 30Mana 'oha na uraosi 'a aho'i 'ari ruma ana, 'a re'ia dona gare ana 'a goro'a aho'i ma dadao hatara'i moi na'i be'a. 'Inia na adaro 'a nugasia'a.

Jisas 'A Ha'agorohia Aho'i Sae

Na Pwarongo Ma Ai'a Hadahada Goro

31'Ia Jisas miraaui rongoiusuri ana'i rau hano baani'i 'omaa gaarangiai 'omaai Taea. Rau 'ari wou rau riutaha na'i 'omaai Saedon mana Provensi Dekapolis maraugu taha aho'i mai na'i kae bwera i Galili. 32Ma ra'i sae rau waa mai sae na pwarongo ma ai'a hadahada goro. Marau ha'angonia wetewete a Jisas do 'ai karohia maai goro aho'i. 33Mia Jisas 'a waia beira'i saesi baaniraaui mwani sae maagu siwi siri suri'i karingana'i saesi. Ma ngisuhiai kaka'una maagu karohiai meameanai saesi 'iniai kaka'una.

7:27 Ni 'ado'ado 'anai tatarani 'a o'ani: 'Iraui gare ra ura 'iniraaui Jiu. Mana misu 'a ura 'iniraaui nei ra ai'a Jiu. 'Ia Jisas 'a 'unua do 'a raba 'a'auhiraui moi Jiu. 'A ai'a arari do 'ai nugasiraui Jiu mai 'a'auhiraui nei ra ai'a Jiu.

34¹A wana ara'ai aro ma osimaro ma o'ani, "Efata!" Mana 'ana 'ado'ado i ha'ateesi, "Ai'a pono'a!"

35²Na'i 'ohasi saesi 'a rorongoro ma ha-ha'atee goro'a aho'i. 36³Ia Jisas 'a ha'a-aburaau wetewetei sae do rai abui maaniai ha'agorohia anai saesi. Rei'uaa na towa'i ha'a-aburaau, miraugu here raorao 'anai taroha'inia hura'a. 37⁴Ira hakoi nei rau rongoa, rau heimwaota'i di'u marau o'ani, "Romwane, maho na haa'i a mo'osi ra goro di'u! 'A ha'agorohiraau aho'i ro'u i pwarongo mana baanguu."

Jisas 'A Hanganiai Hai Merui Sae

(Matu 15:32-39)

8¹Tara'i dangi ahora, ra ragoi sae narau goni ro'u mai beia Jisas. 'Ari wou ma na'i 'oha na rau ai'a to'o mahoingau'a, 'ia Jisas 'agu soiraau mai rongoiusuri ana'i ma o'ani 'iniraau, 2²"Au ta'ahiraau sae 'ini, 'inia 'e oru dangi'a narau awa be'iningaau ma na'i 'ohanisi raugu ai'a to'o mahoingau 'anai ngau. 3³Ma'au gasi ha'a-taariraau 'ari suri'i 'omaa adaa'i ha'i hioro, maraugu dionga'i moi suri tara. 'Inia tara'i nei 'iniraau rau boi ha'atau di'u."

4⁴Me 'iraau rongoiusuri ana'i rau o'ani, "Igaau gau awa na'i dora mangasara. 'A bwa'i dora na gaigui sadoia ta mahoingau nai arariraau mwane sae 'ini."

5⁵Ia Jisas 'a songa'iniraau o'ani, "E siha huai bredi na bei'amou?" Marau aramia o'ani, "E biu."

6⁶Ia Jisas 'agu 'unua tanaraau sae 'anai heinagu dio na'i ano ma dauai biu hua bredisi. Mana 'oha na ha'atee ha'agorohia hako a God 'ini'i, 'a uubi'i ma haa'i tanaraau rongoiusuri ana'i 'anai hatora'ini'i tanaraau sae. 7⁷Ma ra'i gere ii'a ro'u narau to'ora'i. Mia Jisas 'a ha'atee ha'agorohia God 'ini'i ma haa'i tanaraau rongoiusuri 'anai hatora'ini'i ro'u tanaraau sae.

8-9⁸⁻⁹Mana nei ra ngau 'a 'onaai hai merui sae. Rau ngau marau masu goro. Na'i muri raugu ha'ahonuai biu abira raha 'ini'i dorai mahoingau ra ngau tahi'i. Naasi mia Jisas 'agu ha'a-taariraau aho'i sae. 10¹⁰Ma ta'e ara'a na'i ora beiraau rongoiusuri ana'i marau 'ari na'i distrik ra 'unua 'inia Dalmanuta.

'Iraau Farisei Ra Ha'angoniai Ha'abu'oahu

(Matu 16:1-4)

11¹¹Ra'i Farisei ra boi beia Jisas marau taraawa'a heiraeraesi beia 'inia rau raba ha'imaania. Rau 'unua tanaa Jisas 'anai haa ta ha'abu'oahu 'anai ha'ata'inia tanaraau 'onaa 'ia God ha'a-momori na haa tanaai mena. 12¹²Ia Jisas 'a osimaro ma o'ani, "Ini 'uaana na 'imou mou raba re'ia ta ha'abu'oahu 'anai ha'ata'inia do'inau 'au boi baania God? Wai 'unua ha'a-momori tana'amou, 'a bwa'i ha'abu'oahu na wai haa tana'amou!"

13¹³Ma hano baaniraau, 'a ta'e ara'a aho'i na'i ora marau tahamora aho'i 'ari nata batarau kae bwera i Galili.

**Jisas 'A Ha'abasuraau Rongoiusuri Ana'i
Do Rai Abui Heitohe 'Onaairaaui Farisei**

(Matiu 16:5-12)

14'Oha rau 'ari wou mau suriai wai, 'iraaui rongoiusuri raugu 'iraraa do rau kaku'aa'i waa'i tadaa'i breidi. 'E ta'i huai breidi moi na rau to'oraa. 15'Ia Jisas 'a ha'abasuraau o'ani, "Moi 'ome'ome goro mamoi 'omesuri'amou baaniai draebam adaau Farisei mea Mwaeraha Herod."

16'Iraaui rongoiusuri rau maania haariraau mahosi marau o'ani, "Gau ai'a to'o breidi na 'unua o'asi 'iniasi."

17'Ia Jisas 'a 'iraraa'i taha na rau maania ma ha'atee o'ani 'iniraaui, "A 'ua mou hadanga'inia 'iniai ai'a to'o breidi amou? Mou ai'a aidangisia mau? Mou ai'a aidangisia 'inia ra baabau tahingamoo'i! 18-19Mou to'o maa, ma 'ua namou ai'a 'ome 'iraraa 'inia? Ma mou to'o karinga, ma 'ua namou ai'a rongo 'iraraa 'inia? 'A 'ua? Mou kaku'aa'a i 'oha nau uubiai rima huai breidi tanaai rima merui sae ani? 'E siha abira na mou ha'ahonua 'ini'i dora na rau ngau tahi'i?"

Marau aramia o'ani, "E ta'i tangahuru mana rua."

20Maagu songa'iniraaui ro'u o'ani, "Ma na'i 'oha nau uubiai biu huai breidi tanaai hai merui sae ani, 'e siha abira na mou ha'ahonua 'ini'i dora na rau ngau tahi'i?"

Marau aramia o'ani, "E biu abira."

21Ma o'ani 'iniraaui, "A 'ua? Mou ai'a aidangisia ro'u mau? Hoita, moi wai'ado'ado goro 'ini'i maho nau 'unu'i 'isi!"

**Jisas 'A Ha'agorohia Aho'i Sae
Na Kuru Na'i Betsaeda**

22Rau ataha mai na'i Betsaeda, ma ra'i sae rau waia mai sae na kuru. Marau bongal'inia Jisas do'ai karohiai saesi mai 'ome'ome aho'i. 23'Ia Jisas 'a dau na'i rimana ma urua hura'a baaniai 'omaasi. Ma ngisuhi'i maanai saesi, 'a karohi'i ma o'ani 'inia, "A 'ua? Ra'i maho na'o re'i'i?" 24Mana saesi 'a wana ara'a ma o'ani, "Au re'i'i sae maragu 'ome 'onaai'i hasi'ei nara hahano hairiu."

25'Ia Jisas 'a karohi'i ro'u i maanai saesi. Mana saesi 'a wanawana wetewete. Ma na'i 'ohasi, 'agu 'ome'ome aho'i ma matai 'ome 'irara'i goro hako aho'i mwani maho. 26Mia Jisas 'a ha'atee wetewete tanaa o'ani, "Oi 'ari odo-odo aho'i ruma amua. 'Oigu abui siri aho'i'a i 'omaa 'anai to'o taroha'inia 'ari taha na to'o tana'o."

**Pita 'A Ha'arangasia Hura'a
Do 'Ia Jisas Na Ha'atahi**

(Matiu 16:13-20; Luk 9:18-21)

27Mia Jisas mana rongoiusuri ana'i rau 'ari suri'i gere 'omaa gaarangiai 'omaa raha i Sisaria Pilipae. 'Oha rau 'ari wou mau suriai tara, 'ia Jisas 'agu songa'iniraaui o'ani, "A 'ua? 'Iraaui sae, rau 'unua do 'inau 'iatei?"

28Marau ha'atee o'ani, "Rau 'unua do i'oe 'e nei na mae na suruta'e aho'i. Tara'i nei ra 'unua do i'oe a Jon Bwareomaea. Ma tara'i nei ra 'unua do i'oe naasi a Rarabea Elaija ma tara'i nei ro'u ra 'unua do i'oe 'e Rarabea mau mai na'i na'o."

29Mia Jisas 'a o'ani 'iniraa, "Mi'amou mou 'adoma'inia do 'inau 'iatei?"

Mia Pita 'a o'ani, "I'oe naasi Ha'atahi na 'ia God na duruduru 'inia 'anai ha'ataaria mai."

30Mia Jisas 'a o'ani, "Moi abui 'unua'a ro'u tanaa ta sae do 'inau a tei!"

Jisas 'A Maania Hura'ai Rongomaata'i

Mana Mae Nai Haa

(Matiu 16:21-28; Luk 9:22-27)

31Na'i 'ohasi 'ia Jisas 'a taraawa'a ha'ausuriraa ro'u i rongoiusuri ana'i. 'A o'ani, "Inau, i Gare'i Inoni, rai ha'a-rongomaata'iau di'u. 'Iraaui Na'ohadaa'i Piriisi miraaui Ha'ausuri 'anai Ringe ana'ia Moses ma tara'i saemau ro'u rai 'utaiu marai ha'amaesiau. Ma 'e rua dangi nai hako mana'i oruna, waigu suruta'e aho'i." 32'Oha 'ia Jisas 'a mamaani tanaraau, ai'a girua ta ta'i maho baaniraa.

Mia Pita 'a waia beira'i a Jisas ma ha'atee ha'abwarasia. 33Mia Jisas 'a rihota'i ma wanasiraaui rongoiusuri ana'i magu ha'atee wetewete o'ani tanaa Pita, "Saetan, hora wou baaniau! Maho na'o 'unu'i 'isi, ai'a 'ado'adona God, ma'lata ra'i 'ado'ado ni noni moi!"

34'Ia Jisas 'a 'unuraa mai sae rago miraaui rongoiusuri ana'i ma ha'atee o'ani 'iniraa, "Iatei na raba ha'i rongoiusuri agua, 'ai nugasiai hei'irisina haaria, 'ai mwa'emwa'e 'anai suru'iai dadaahoro ana, † maai suriau. 35'Ia tei na raba dau baabau na'i tahingana na'i marewanani, 'a bwa'i to'oraai huunai tahi. Me 'ia tei na mwa'emwa'e 'anai ha'a-ai'aa'i tahingana 'iniai suriau ana mana Taroha Goro, 'ai to'ora nana i tahi. 36'A 'ua? 'Onaa tanei 'ai to'ora'i hako nana i mwani maho na'i marewana, ma bwa'i dau nana i huunai tahi, mareho 'isi rai 'a'auhia? 'A bwa'i! 37'Onaa 'ai mae, 'a bwa'i maho 'isi naigu haua 'anai horia aho'i tahingana.

38"‘Inau na Gare'i Inoni, wai boi aho'i mau ta 'oha beiraui enjel ana'ia God beiai mena mana raraha na ta'isada beia amagu. Mana 'oha wai boi, waigui 'utairaaui nei ra ora-ora'a nara ninimata'inau na'i 'ohani. Ma wai 'utairaa ro'u i nei ra ninimata'i taroha'ini'i ha'atee agu'i."

9¹Mia Jisas 'a ha'atee o'ani ro'u 'iniraa, "Wai 'unua ha'a-momori tana'amou: Tara'i nei 'ini'amou 'ini moi awa tari mau 'anai 'omesia God 'oha nai marungiraaui noni beiai mena."

Jisas 'A Aho'ita'i Raraha

(Matiu 17:1-13; Luk 9:28-36)

2'E ono dangi na hako, 'ia Jisas 'a waia Pita, Jems, mea Jon, 'anai ta'eha haariraa na'i hunganai hungahunga ahaaha. 'Oha narau awa 'isi, raugu

8:34 *Mwa'emwa'e 'anai suru'iai dadaahoro*: Ni 'ado'ado 'ana 'a o'ani. 'Onaa 'o mwa'emwa'e 'anai suru'iai dadaahoro amua, 'a minimua do 'o mwa'emwa'e 'anai rongomaata'i ma'ua mae 'onaai rongoiusuri ana Kraest. 'Inia na'i madoraa ana Jisas, 'iraui sae nara suru'iai dadaahoro, ra hano 'anai mae.

'asu'a i waira orusi mana 'omehana Jisas 'a orisi'a, ³mana to'oni ana 'a mamaahui wadowado. ⁴Na'i 'ohasi, rau 'omesiai ha'amaranga ana Moses mea Elaija, mararu mamaani beia Jisas. ⁵Mia Pita 'a ha'atee o'ani 'inia Jisas, "Saemaua, 'a goro nagau awa 'ini! Mei ha'a-urasia ta oru hare, 'e ta'i tana'o, 'e ta'i tanaa Moses, ma ta ta'i tanaa Elaija." ⁶Ia Pita 'agu to'o ha'atee o'asi moi, suria rau kae maaa'u di'u. ⁷Raugu 'ome ma'e rorodo na dio huniraaui ma marumarusiraau. Na'i 'ohasi rau rongoai ringe na ao mai baaniai rorodosi, 'a o'ani, "Naani garegu nau ta'ahia. Moi rongosuria!" ⁸Raugu 'ome'ome hairiu, mia Moses mea Elaija raugu ai'a 'omesiraru'a, 'iia moia Jisas naraugu re'ia.

⁹Oha 'ia Jisas mana oru rongoiusuri ana rau dio mau na'i hungahunga, 'ia Jisas 'a ha'atee wetewete tanaraau. 'A o'ani, "Moi abu maani'i tanaa ta sae i mareho na mou re'i'i, tari 'oha 'inau, na Gare'i Inoni, wai suruta'e aho'i baaniai mae." ¹⁰Miraau araisuriai taha na 'unu'i tanaraau. Ma'ata ra kakui ahudaa'i 'inia 'ado'ado 'anai suruta'e aho'i. Maraugu taraawa'a heisonga'i hairiu 'inia. ¹¹Rau songa'inia o'ani a Jisas, "A 'ua na 'iraau'i Ha'ausuri 'anai Ringe ana'ia Moses rau 'unua 'inia do'ia Elaija 'ai boi na'i na'o, maigui boi Ha'atahi?"

¹²⁻¹³Ma aramiraau o'ani, "A ha'a-momori. 'Ia Elaija 'ai boi na'i na'o 'anai ha'aagauraaui mwani noni 'anai boi anai Ha'atahi. Ma'ata 'inau wai 'unua tana'amou. 'Ia Elaija 'a bwane boi'a, miraau sae rau haa'i here nara ai'a goro tanaa 'onaai 'unua ada na'i Usu-usu Maea. 'Onaa na Usu-usu Maea 'a 'unua o'asi, moi wai'ado'ado goro 'ini'i maho na wai 'unu'ini. 'A 'unua ro'u do 'inau, na Gare'i Inoni, wai rongomaata'i di'u marai 'utaiau."

Jisas 'A Ha'agorohia Aho'i Garemwane

Na Adaro 'A Bwaunia

(Matiu 17:14-21; Luk 9:37-43a)

¹⁴Oha 'ia Jisas mana oru rongoiusuri rau taha dio mai baaniai hungahunga, rau 'omesiai kae ruruhai noni ra garigariraau'i rongoiusuri. Ma tara'i nei 'iniraau'i Ha'ausuri 'anai Ringe ana'ia Moses ra heitohetohe be'iniraau'i rongoiusuri. ¹⁵Oha 'iraau'i sae 'isi rau re'ia Jisas, rau heimwaotal'i di'u marau 'eba 'anai heito'oi beia. ¹⁶Ia Jisas 'agu songa'iniraau'i rongoiusuri ana'i o'ani, "E taha mou heitohetohe-nga'inia?"

¹⁷Ma'e ta'i nei 'iniraau na'i ruruhasi 'a aramia o'ani, "Ha'ausuri, 'au waia mai tana'o i garemwane agua na adaro 'a bwaunia maagu ai'a ha-ha'atee'a. ¹⁸Oha na adaro 'a bwaunia, 'a 'onaai sae na manumanu'a. 'A ha'a-ngadingadi'i rihona ma ngadia hakoi abena. 'Au 'unua tanaraau'i rongoiusuri amu'i dorai taariai adaro baania maraugu bwarai taaria hura'a."

¹⁹Naasi mia Jisas 'a o'ani 'iniraau, "I'amou inoni 'ohani, mou bwarai hinihini! 'Ai orea he'uai maratanoa nawai haua bei'amou, ma'ua wai awa orea tari he'ua bei'amou mamoigu hinihini? Mou waia mai garesi!" ²⁰Marau waia 'ari tanaa Jisas.

Ma na'i 'oha na adaro 'a re'ia Jisas 'a 'idira'ini'ai garesi, ma ahoda dioi ano. Ma buriburi 'ari na'i ano mana hutohuto ra hura'a na'i ngoona. ²¹Mia Jisas 'a songa'ini'ai amanai garesi, "A orea he'ua'a i bwaunia na haua i adaro?"

Mia amanai garesi 'a aramia o'ani, “Taraawa'a mau mai 'oha na kekerei'a. ²²Rago'a i 'oha na adarosi 'a gaasia ara'a na'i 'eu mana ha'adodohia na'i wai 'anai ha'amaesia. 'Onaa 'ai mwada'u, Araha, 'oi 'a'auhi'ameu.”

²³Mia Jisas 'a o'ani 'inia, “Ni 'uaana na'o 'unua 'inia dona “Onaa 'ai mwada'u?” Mwane maho rai mwada'u tanaai nei na hinihinia God!”

²⁴Ma na'i mau 'ohasi, na amanai garesi 'a ha'atee raha ma o'ani, “Inau 'au hinihini moi, maagu ai'a raha i hinihinigu. 'Oi 'a'auhiau mai wetewete i hinihinigu!”

²⁵'Ia Jisas 'a 'ome 'irararaau sae ra taraawa'a ruru mai beia, maagu ha'atee hurasi o'ani tanaai adaro, “Adaro na'o ha'apwarongo'i mo'o ha'abanguu'i sae, 'oi hura'a baaniai garenai ma'oi abui siri'a ro'u beia ta'oha!”

²⁶Mana adaro 'a awara raha ma 'idira'inia ha'atai garesi maagu hura'a baania. 'Iraau sae ra 'unua'a dona garesi 'a mae'a 'inia 'a dadao hatara'i moi.

²⁷Mia Jisas 'a dau wou na'i rimana ma ha'a-suruta'ea maagu ura ara'a.

²⁸Na'i murina, 'ia Jisas mana rongoiusuri ana'i rau 'ari aho'i ruma. Ma na'i 'oha rau awa haarirau raugu songa'inia Jisas o'ani, “'A 'ua na bwara 'inia tana'ameu 'anai taaria hura'a i adaro ani?”

²⁹Mia Jisas 'a o'ani 'inirau, “Ha'arahesi moi na matai taari'i hura'a i adaro ta'a'i o'asi.”

Jisas 'A Maania Ro'u i Mae Nai Haa

(Matiu 17:22-23; Luk 9:43b-45)

³⁰'Ia Jisas miraaui rongoiusuri ana'i rau hano baaniai dorasi marau 'ari daara'i suri'i 'omaa na'i Galili. 'Ia Jisas 'a ai'a rabasia tanei nai 'iraraai dora na awa iei, ³¹'inia 'a ha'ausuriraaui rongoiusuri ana'i 'iniai taha na rai to'o tanaa. 'A ha'ausuriraaui o'ani, “'E nei nai usuha'iniau i Gare'i Inoni tanaraau nei narau ha'imaie beiau marai ha'amaesia. Ma 'e rua dangi nai hako mana'i oruna, wai suruta'e aho'i baaniai mae.”

³²Miraaui ai'a 'adoma'i tarihanai 'ado'ado 'anai mamaani ana, marau maguguta'i songa'inia ro'u 'anai ha'a-aidangisiraaui 'inia.

'Iatei Nai Ororiu?

(Matiu 18:1-5; Luk 9:46-48)

³³Rau taha mai 'omaai Kapaniam ma na'i 'oha rau siri na'i ruma, 'ia Jisas 'a songa'iniraaui rongoiusuri ana'i o'ani, “'E taha mou hadanga'inia ani, 'oha gau boi suriai tara?” ³⁴Miraaui ai'a aramia, 'inia na'i 'oha rau boi suriai tara, rau hadanga'inia tei 'iniraaui na ororiu di'u.

³⁵'Ia Jisas 'a heinagu auru ma 'unuraau mai gaarangi rongoiusuri ana'i ma ha'atee o'ani 'iniraaui, “'Ia tei na raba ha'i sae ororiu 'ini'amou, 'ai ha'anoanoa mai mwa'emwa'e 'anai 'a'auhia namoiwou tanei 'ini'amou.”

³⁶Mia Jisas 'a waia mai gare kekerei, 'a ha'a-urasia na'i maadau hako ma abea maagu ha'atee o'ani, ³⁷“'Onaa 'o ha'amaotoa ta nei 'onaai garenai suria 'o ta'ahiau, 'io'e 'o ha'amaotoau ro'u. Ma 'onaa 'o ha'amaotoau, 'o ai'a ha'amaotoau moi, mia ro'ua God na ha'ataariau mai.”

'Iatei Na Aba Beia Jisas?*(Luk 9:49-50)*

38 Mia Jon 'a ha'atee o'ani 'inia, “Ha'ausuri. Meu re'iai sae na taari'i adaro hura'a baani'i sae 'inia'i atamu mameu ha'aabua, 'inia 'iia ai'a ta'i 'inia'i ruruha agaau.”

39 Mia Jisas 'a o'ani 'iniraa, “Moi abui ha'aabua. 'Onaa 'e nei nai haa'i ha'abu'oahu 'inia'i atagu, 'agu bwa'i 'asu'ani ha'atee ha'ata'aiau moi.

40 'Inia 'ia tei na ai'a ura bwarasigaau, 'iiasi 'e aba 'inia'i ruruha agaau.

41 Ha'amomori! Wai 'unua tana'amou: 'Ia tei na 'a'auhi'amou 'inia ta gere maho, 'onaai ha'a-gonohi'amou, 'inia 'a 'iraraa do 'imoo mou ta'ahiau, 'ai daua nana i heitahari.”

'A Ororiu Di'u Do Gai Dauai Tahī Tarau*(Matiu 18:6-9; Luk 17:1-2)*

42 Mia Jisas 'a ha'atee o'ani ro'u, “'Onaa 'ia tei sae nai raba ha'atehaa ta nei 'iniraaui nei kekerei 'ini narau hinihiniau, 'a goro do ra ga'i ho'osia ta kae hau na'i 'u'una marai hura'a ha'adodohia na'i asi rodo. 'Inia na ha'a-mama'ai na 'ia God nai haua tanaai nei nai ha'atehaa tanei 'iniraa, 'ai ta'aa di'u ro'u wou. 43-44 Hoita, 'onaa na rimamu nai haai maho na'o ora-ora'a 'inia, 'oi horo gaasinga'inia. 'O gasi to'oraai rua rimamu ma'ogui siri na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro baania do'oi dauai tahī tarau beia moi ta'i rima. 45-46 Ma 'onaa na uwamu nai haai maho na'o ora-ora'a 'inia, 'oi horo gaasinga'inia. 'O gasi to'oraai rua uwamu maraigui gaasi'o na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro baania do'oi dauai tahī tarau beia moi ta'i uwa. 47-48 Ma 'onaa na maamu nai haai maho na'o ora-ora'a 'inia, 'oi suki gaasia hura'a. 'O gasi to'oraai rua maamu ma ragui gaasi'o na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro i awa tarau na'i heimarungi ana God beia moi ta'i maa baaniai siri na'i dora-ni-rongomaata'i beiai rua maa hako.

49 “Naasi, 'ia God 'ai ha'ausuriraaui sae ana'i 'ini'i rongomaata'i nara siri suri'i na'i marewana. Mia God 'ai ha'a-mama'airaaui nei nara ai'a suria na'i 'eu na bwa'i kuru'a ro'u ta 'oha.

50 “'Io, solt 'a goro 'anai ha'angaugoroai mahoingau. Me 'onaa 'aigu ai'aa i asi'ahana, ma naasi 'agu bwa'i here'a ro'u naraigui haua 'anai ha'a-asi'aa ro'u. 'A o'asi ro'u, 'onaa mou awa heihoa na'i tahingamoo'i 'a 'onaai solt na ai'aa'i gorohana. Naasi moi awa hagu goni goro!”

Haigaasi Na'i Ha'iwai*(Matiu 19:1-12; Luk 16:18)*

10 1 Mia Jisas mana rongoiusuri ana'i rau hano baaniai Kapaniam. Rau ataha wou na'i Provensi Jiudea marau 'ari 'anai nata batarau wai Jodan. Ma ra rago ro'u i sae nara boi beia Jisas, maagu ha'ausuriraa ro'u 'onaai bwane hahaua ana.

²Tara'i Farisei ra boi beia Jisas, 'inia rau raba ha'imaania 'onaa na heiarami ana 'a ta'isada beiai Ringe ana'ia Moses. Marau songa'inia o'ani, "O'i 'unua tana'ameu. 'A 'ua? Na Ringe ana'ia Moses ra ha'awatea moi dona sae 'ai matai gaasiai urao ana?"

³Mia Jisas 'a aramiraau ro'u 'iniai heisonga'i. 'A o'ani, "E taha na ringeringe ana Moses 'a 'unua 'iniai haigaasi?"

⁴Miraau o'ani 'inia, "Ia Moses 'a ha'awatea moi sae ha'iwai 'anai gaasiai urao ana, 'onaa 'ai haua ga'u na'i na'o ta usu-usu ni haigaasi."†

⁵Mia Jisas 'a o'ani, "Ia Moses 'a haua tana'amoui ringeringsi suria mou rongoasa mamou ai'a raba araisuriai Ha'atora ana God. ⁶Na Usu-usu Maea 'a o'ani, "Oha 'ia God 'a ha'apwa'araai marewana, 'a ha'apwa'araai mwane mana urao.† ⁷Na tarana naasi, na mwane 'ai nugasiamana mea inana maai hasi beiai urao ana, ⁸mararui ha'i ta'i abe. Naasi, 'irarua rarugu ai'a 'onaai'a i rua abe, ma'ata 'e ta'i abe moi.† ⁹Na tarana naasi, na noni 'ai abui hoaiiai taha na 'ia God na ho'ogonia."

¹⁰Ia Jisas mana rongoiusuri ana'i rau aho'i 'ari ruma. Miraau rongoiusuri rau songa'inia ro'ua Jisas 'ini'i 'ado'ado 'ada'i maho 'isi. ¹¹Mia o'ani 'iniraau, "Onaa ta mwane nai gaasiai urao ana ma waina ro'u i urao he'ete'i, 'iia 'a taritari'a baaniai urao ana. ¹²Ma ro'u, 'onaa 'e urao na gaasiai mwane ana ma waina ro'u i mwane he'ete'i, 'iia 'a taritari'a ro'u baaniai mwane ana."

Jisas 'A Ha'agorohirai Gare Kekerei

(Matiu 19:13-15; Luk 18:15-17)

¹³Ra'i sae ra waa'i mai gare tanaa Jisas do'ai karohiraau maai ha'atee ha'agorohiraau. Me 'iraau rongoiusuri ana'i rau ha'a-aburaau sae 'isi.

¹⁴Oha 'ia Jisas 'a 'iraraa o'asi, 'a taesu'a 'adaai rongoiusuri ana'i ma o'ani 'iniraau, "Moi abui ha'a-bwarasiraau. Moi wateraui gare marai boi beiau. 'Inia 'iraau nei ra 'onaairaausi, naasi nei nara arari 'anai siri na'i heimarungi ana God. ¹⁵Inau wai 'unua ha'a-momori tana'amou: 'Ia tei na bwa'i 'u'uria God 'onaai gare, 'a bwa'i awa bahainai heimarungi ana God." ¹⁶Mia Jisas 'a wairaaui mai gare beia ma aberaaui. 'A nugaai rimana na'i hungadaau ma ha'atee ha'agorohiraau.

'E Sae Na Toto'ora

(Matiu 19:16-30; Luk 18:18-30)

¹⁷Oha na taraawa'a hano ro'ua Jisas mana rongoiusuri ana'i, 'e sae na 'eba mai ma topira'i ruru tanaa Jisas ma o'ani, "Ha'ausuri! I'oe 'e sae goro! 'E taha nawai haua nawai daua 'inia i tahi tarau?"

¹⁸Ia Jisas 'a aramia o'ani, "Ni 'uaana na'o 'unua 'inia do 'inau 'au goro? Ai'a tanei do 'ai goro, me 'iia moi a God. ¹⁹I'oe 'o bwane aidangisi'i'a i Ha'atora: Abui ngahu ha'amaesia sae; abui taritari'a baaniai urao amua ma'ua mwane amua; abui beri; abui pwari'i na'i kooti; abui ha'a-

bweubweu'aai sae 'inia mahona to'oraa; ma'oi ha'ahoua amamu mea inamu.”[†]

²⁰Mana saesi 'a o'ani, “Ha'ausuri, na mwane mareho 'isi 'au bwane ha'isuri'i mau mai na'i 'oha nau kekerei.”

²¹Mia Jisas 'a wana to'obuu 'inia ma ta'ahia maagu o'ani, “E ta'i mareho na i'oe 'o ai'a haua mau. 'Oi 'ari ma'oi raonga'ini'i hako mareho na'o to'oraa ma'oi haua ha'a tanaraaui sae pohara. 'Onaa 'oi haua o'asi, 'oi toto'ora na'i aro. Na'i muri 'oigui boi suriau.”

²²'Oha na rongoa, maagu 'ome ahutotou'a. Ma hano'a ha'i ahutotou, 'inia 'iia 'e sae na toto'ora di'u.

²³'Ia Jisas 'a wanasiraaui hairiu i sae ma o'ani 'iniraau rongoiusuri ana'i, “'Ai bwara di'u tanaraaui sae ra toto'ora 'anai siri na'i heimarungi ana God.”

²⁴'Iraau rongoiusuri ana'i rau heimwaota'i di'u 'ini'i mahona 'unu'isi. Mia Jisas 'a o'ani ro'u 'iniraau, “Mwani sae agu'i, 'a bwara di'u 'anai siri na'i heimarungi ana God! ²⁵'A 'ua? I mwamwaa nara 'unua 'inia kamel 'a matai siri daara'i na'i maana nira? 'A bwara! Ma bwara di'u ro'u wou tanaa nei na toto'ora 'anai siri na'i heimarungi ana God.”

²⁶Na'i 'oha rau rongoa o'asi rongoiusuri, raugu heimwaota'i di'u marau ha'atee o'ani, “Romwane, 'onaa na o'asi, 'a 'ome 'onaa do 'a bwa'i ta sae nai daua tahi tarau!”

²⁷Mia Jisas 'a wanasiraaui ma o'ani, “Beiai noni 'a bwarai daua haariraaui tahi tarau, mei beia God 'a ai'a mahona i bwara tanaa, 'inia tanaa God mwane mahona ra mwada'u moi.”

²⁸Mia Pita 'a o'ani 'inia, “'Ome! 'I'ameu meu nugasi'i hako mwane mahona amee'i mameu suri'o!”

²⁹⁻³⁰Mia Jisas 'a o'ani 'iniraau, “'Au 'iraraana. 'Inau wai 'unua ha'a-momori tana'amou: 'Ia tei na nugasi'i mwane mareho ana'i 'inia 'a suriau mana Taroha Goro, 'iia 'ai dau'i mwani mareho di'u'i mareho na nugasi'i 'isi. 'Onaa 'ai nugasiai ruma ana ma'ua do'orana'i, asina'i, amana, inana, gare ana'i ma'uai dorai ano ana, 'ia God 'ai huunai ha'agorohia. Ma na'i marewana 'ai ha'arago'i tanaa mwani mahona 'isi. Me 'iraaui sae rai ha'a-mama'aia ro'u! Ma'ata na'i madoraa nai boi mau, 'aigui daua nana i tahi tarau. ³¹Ma naasi, 'a ragoi nei nara ororiu na'i 'ohani, rai ha'i sae haari'i moi. Ma ragoi nei ra ai'a ororiu na'i 'ohani, 'ia God 'ai ha'a-ororiu'araau.”

Orunai 'Oha Na 'Ia Jisas
'A Hadanga'inia Mae Nai Haua
(Matiu 20:17-19; Luk 18:31-34)

³²'Oha rau suriai tara na ta'eha 'anai Jerusalem, 'ia Jisas 'a hano na'i na'o 'iniraau rongoiusuri ana'i. 'Iraau rongoiusuri ana'i rau heimwaota'i di'u 'inia, miraau sae ra haisuri ra maaa'u. Jisas 'a wairaaui haariraaui ro'u i rongoiusuri ana'i ma maani'i tanaraaui taha na rai to'o mau tanaa.

33'A o'ani 'iniraa, "Moi bahurongo goro. Na'i 'ohanisi gau hahano'a 'anai Jerusalem. Maagu na'i 'isi, 'e nei nai usuha'iniau i Gare'i Inoni tanaraau i Na'ohadaa'i Piriisi mana Ha'ausuri 'anai Ringe ana'ia Moses. Rai hiiriau 'anai ha'amaesiau marai usuha'iniau ro'u tanaraau nei ra ai'a Jiu. 34Rai haikou 'iniau marai ngisuai abegu marai rorohoau maraigu ngahu ha'amaesiau. Ma'ata 'e rua dangi nai hako mana'i oruna, wai suruta'e aho'i baaniai mae."

Na Hei'irisina Jems Mea Jon

(*Matu 20:20-28*)

35'Ia Jems mea Jon rua garena Sebedi, raru boi beia Jisas ma raru ha'atee o'ani 'inia, "Ha'ausuri, 'e ta'i maho na miri 'irisina do'oi haua tana'amiria."

36'Mia Jisas 'a songa'inirarua o'ani, "E taha muru rabasia?"

37'Ma rarugu aramia o'ani, "Na'i madoraa na'oi mwaeraha ma'oi marungiraaui noni, miri raba heimarungi bei'o. Tanei nai heinagu na'i dora ni mwaeraha na'i aba odomu ma tanei na'i maha."

38'Mia Jisas 'a o'ani 'ini'ararua, "I'amurua muru ai'a aidangisiai maho na muru ha'angoniasi. 'A 'ua? Muru ga'i siri moi na'i rongomaata'i na 'inau wai siri iei? Ma muru ga'i matai mae moi 'onaai mae na wai haua?"

39'Miraru aramia Jisas o'ani, "Miri ga'i haa moi!"

Mia Jisas 'a o'ani ro'u, "Ha'amomori di'u. Murui rongomaata'i ha'a-momori 'onaai rongomaata'i na 'inau wai haa ma murui mae moi 'onaai mae na wai haua. 40Ma'ata 'inau 'au bwa'i sigihia 'iatei nai heinagu na'i odogu ma'ua na'i mahagu. 'Iia moi a God nai 'unua 'iatei nai heinagu beiau. 'Inia 'iia 'a bwane 'ome sigihiraaui."

41'Oha 'iraaui nata tangahurui rongoiusuri ana'ia Jisas rau rongoai mahosi, rau taesu'a di'u 'ana Jems mea Jon.

42'Mia Jisas 'a 'unuraaui hako mai beia, ma o'ani 'iniraa, "Mou bwani 'iraraa doni mwaeraha mana na'otara adaa'i sae ra ai'a Jiu, rau ha'aba'o 'inia heimarungi narau haua ma goro adaaui i haa'i mwani heiatenga'i tanaraau noni. 43Ma'ata 'ai abui o'asi bei'amou. 'Ia tei nai raba na'otara tana'amou, 'iia 'ai ha'i sae tatau'aro tana'amou. 44Mia tei na raba bwauodo, 'ai ha'i slev tana'amou hako. 45Moi ha'isurui herehere agua. 'Inaui Gare'i Inoni 'au ai'a boi do 'irai sae rai tau'aro tanaau. Me 'inau 'au boi do 'inau wai tau'aro tanaraau, ma 'anai wateai tahingagu 'anai ha'atahiraaui baaniai ora-ora'a."

Jisas 'A Ha'a-wanawanaa Aho'i a Batimeas

(*Matu 20:29-34; Luk 18:35-43*)

46'Jisas mana rongoiusuri ana'i rau tahai 'omaai Jeriko. Ma na'i muri, 'oha rau hura'a baaniai 'omaasi, 'a ragoi sae ra suriraaui. Ma'e sae na kuru na atana 'ia Batimeas 'a heheinagu na'i bobonai tara, 'iiasi 'e garena Timias. 'Iia 'a heinagu 'isi'a 'anai ha'angoni ha'a beiraaui noni rau tatahahoro na'i tarasi. 47'Na'i 'oha na 'iraraa do 'ia Jisas, 'e sae ni Nasaret na boi na'i tarasi, 'agu taraawa'a awara raha o'ani, "Jisas, warowarona Deved. 'Oi arunga ta'ahiau ma'oi 'a'auhiau!"

48Ragoi sae ra 'unua do 'ai papaku, mia awara raha ro'u baaniai na'o, "Jisas, warowarona Deved, 'oi arunga ta'ahiau ma'oi 'a'auhiau!"

49Jisas 'a ura papaku ma o'ani 'iniraa, "Moi 'unua mai."

Maraugu o'ani 'inia Batimeas, "Ai abui ta'aabemu. 'Ia Jisas 'a 'unu'o, 'oi ura ara'a!"

50'Ia Batimeas 'a rege ara'a ma gaasiai to'oni bo-hura'a ana, ma 'ari beia Jisas.

51Jisas 'a songa'inia o'ani, "E taha na'o 'irisia do wai haua tana'o?"

Mia aramia Jisas o'ani, "Ha'ausuri, 'au raba wanawana aho'!"

52Mia Jisas 'a ha'atee o'ani tanaa, "Io, na hinihinimu na ha'agorohi'o. 'O'i 'ari'a."

Na'i mau 'ohasi na sae kurusi 'agu wana. Ma hano beia Jisas suriai tara.

Jisas 'A Taha Siri Na'i Jerusalem

(Matiu 21:1-11; Luk 19:28-40; Jon 12:12-19)

11 1'Oha 'ia Jisas mana rongoiusuri ana'i rau gaarangia wou i Jerusalem, rau 'omesia 'ari 'omaai Betfeis mana Betani gaarangiai hungahungai 'Oliv. Mia Jisas 'a ha'a-taarirarua i rua rongoiusuri 'anai 'ari na'o. 2'A o'ani 'inirarua, "Murui hano mamurui 'ari nai 'omaa 'ariani. Ma na'i 'oha murui taha siri wou, murui re'iai garei dongki nara ho'osia. Na garei dongkisi ai'ta sae mau nai ta'e na'i hungana. Naasi murui wagasia ma murui waia mai tanaau. 3'Ma 'onaa ta sae nai songa'ini'amurua 'inia tei na 'unua tana'amurua do murui waiai mwamwaasi, murui o'ani 'inia, 'Ia Araha na rabasia ma'ai ha'ataaria aho'i raurau moi mai."

4'Oha raru ataha wou, raru re'iai dongki ra ho'osia na'i bobonai maraaruma. Raru 'ariwou ma raru tahamora wagasia, 5'ma ra'i sae nara ura 'isi ra o'ani 'ini'ararua, "Eei! 'A 'ua na muru wagasia 'inia i mwamwaasi?" 6'Mararu 'unu'i maho 'ia Jisas 'a 'unu'i tanararua, maraugu watea tanararuai dongki ma raru hano beia.

7'Oha raru ataha aho'i beia Jisas, raru rahi'i tara'i to'oni bo hura'a adaru'i ma raru nuga'i na'i hunganai mwamwaasi. Mia Jisas 'a heinagu ara'a na'i hungana.

8Ragoi sae ra haa'i bwana bo hura'a adaa'i mara haari'i 'ari suriai tara. Ma tara'i sae ra 'ari mara tabari'i hasi'ei nara hahaa'a mara haari'i hahaa'i na'i tara. 9'Mana sae ra na'o mana nei na'i murina Jisas raugu awaawara, rau o'ani, "Ha'a-aneanea God!

Araha God, 'oi ha'agorohia mo'o na'o ha'ataaria mai!

10 God 'oi ha'agorohia mo'oni na boi 'anai mwaeraha agaau 'onaai wauwa ameeu a Deved!

Ha'a-aneanea God na'i aro!"†

11'Ia Jisas 'a taha wou i Jerusalem ma siri na'i Ruma Maea ana God ma wanasi'i hako 'ari mwane maho na'i rarona. 'Iia ai'a awa orea, ma 'ari'a i Betani beiraau rongoiusuri ana'i, 'inia 'a su'urahi'a.

Jisas 'A Ha'atee Orohuniai Hasi'ei**Nara 'Unua 'Iniiai Fig***(Matiu 21:18-19)*

12'Oha rau aho'i mai baaniai Betani na'i nata dangi, 'ia Jisas 'a hioro. 13'Ma re'ia 'ari urunai hasi'ei ra 'unua 'iniiai fig. Rei'uua na 'iraraa do'a ai'a tari mau i madoraa 'adaaui fig 'anai hungu, 'a 'ariwou 'anai 'ome'ome hua na'iei. 'Inia 'a 'iraraa do na fig 'ai hungu ma'ata'a 'onaa na to'o rawa. Ma na'i 'oha na 'ariwou gaarangi, 'a 'omesia do nai'i moi rawa na re'i'i. 14'Naasi mia Jisas 'a ha'atee orohuniai hasi'eisi, 'a o'ani, "Ogu bwa'i hungu'a ro'u ta 'oha!" Miraau rongoiusuri ana'i rau rongo'i hakoi maho na 'unu'isi.

Jisas 'A Taariraau Sae**Baaniai Ruma Maea Ana God***(Matiu 21:12-17; Luk 19:45-48; Jon 2:13-22)*

15'Oha rau ataha wou i Jerusalem, 'ia Jisas 'a siriwou na'i dora a'ora na'i maana Ruma Maea ma taraawa'a taarirau hura'a i sae ra horihori mara raoraonga'i na'iei. 'A rihota'ini'i tebol 'anai ori-orisi ha'a mana baba ni heheinagu adaa'i nei ra raoraonga'i waibora. 16'Mia Jisas 'a ha'a-abu'i sae nara raba tahahoro bei'i maho na'i kae dora a'ora na'i maana Ruma Maea. 17'Maagu ha'ausuriraau sae o'ani, "Ra usua o'ani na'i Usu-usu Maea, 'ia God 'a o'ani, 'Na ruma agua 'e ruma ni ha'arahesi adaau hakoi mwane noni suriai marewana.' Mi'amou mou ha'i dorani bainihu 'inia nadaaui sae beriberi!"[†]

18'Miraau na Na'ohadaaui Piriisi mana Ha'ausuri 'anai Ringe ana'ia Moses, rau rongo to'oana marau taraawa'a siba herehere 'anai ngahuia Jisas. Ma'ata rau magugu ro'u, 'inia ra ragoi sae ra heimwaota'i di'u 'iniiai ha'ausuringa'i ana'i.

19'Ma na'i su'urahi, 'ia Jisas miraaui rongoiusuri ana'i raugu hura'a aho'i baaniai Jerusalem.

Hinihini Mana Ha'arahesi*(Matiu 21:20-22)*

20'Oha rau 'ari wou suriai tara na'i haho'oanai nata dangi, rau re'iai hasi'ei na ha'atee orohunia ania Jisas 'a nugu'a. 21'Mia Pita 'a hasi 'adoma'i aho'isia ma o'ani 'inia Jisas, "Ha'ausuri, 'ome! Na hasi'ei na'o ha'atee orohunia 'ani 'a nugu'a!"

22'Mia Jisas 'a o'ani, "Moi hinihinia God! 23'Inau wai 'unua ha'a-momori tana'amou: 'Ia tei nai hinihini ma bwa'i 'adoma'i heiruarua'a, 'ai matai o'ani 'iniiai hungahungani, "Oi sara baaniai dorani ma'oi hura'ai asi!" Na maho nai 'unuasi 'ai to'o'a 'onaai 'irisia anasi. 24'Tarana naasi nau 'unua 'inia tana'amou, do 'oha moi ha'angonia ta maho na'i ha'arahesi, moi hinihini do 'ia God 'a bwane haua'a tana'amou. Maigu haua tana'amoui taha mou 'irisia. 25'Ma na'i 'oha moi ha'arahesi, 'onaa mou taesu'a 'ana tanei, moi 'adoma'i

nugasia ga'u, neina Amamooou na'i aro 'ai 'adoma'i nugasiamou ro'u 'ini'i maho ta'a'i na mou haa'i. ²⁶Ma 'onaa mou bwa'i 'adoma'i nugasiasia, 'ia God na awai aro 'a bwa'i 'adoma'i nugasii ro'u i ora-ora'a amoo'i.”

**'Iraaui Saemaua Adaa'i Jiu Ra Ai'a
Hinihinia Do 'Ia Jisas 'A Boi Baania God**

(Matiu 21:23-27; Luk 20:1-8)

²⁷Mana 'oha rau ataha ro'u mai na'i Jerusalem, 'ia Jisas 'a taha ro'u siri na'i Ruma Maea ana God. 'Iraaui Na'ohadaa'i Piriisi miraaui Ha'ausuri 'ana'i Ringe ana'ia Moses ma tara'i saemaua ro'u rau boi beia, ²⁸marau songa'inia, “‘O'i 'unua tana'ameu, 'iatei na 'unua tana'o do'oi matai haa'i mareho 'isi?”

²⁹Mia Jisas 'a aramiraaui o'ani, “Wai matai aramiai heisonga'i amooou 'onaa moi aramia ro'u i heisonga'i nawai haua tana'amou. ³⁰'Ia tei na 'unua tanaa Jon 'ana'i bwareomaearaaui noni? 'Ia God ma'ua inoni?”

³¹Miraaui hadahada haariraaui hairiu o'ani, “‘E taha nagai 'unua? 'Inia 'onaa nagai 'unua do'ia God, 'iia 'ai 'unua o'ani, ‘Ma 'ua namou ai'a hinihinia 'inia Jon?’ ³²Ma 'onaa nagai 'unua do 'iraaui moi inoni nara 'unua tanaa, ra gasi taesu'a inoni.” Rau 'unua o'asi, 'inia rau maaaa'usiraaui sae na rau hinihinia do'ia Jon 'e huunai rarabea.

³³Miraaui aramia o'ani, “Meu ai'a 'iraraa.”

Mia Jisas 'a o'ani 'iniraaui, “Nau bwa'i rangasia ro'u tana'amou 'iatei na 'unua tanaau do wai matai haa'i mareho 'isi.”

**Ha'atee Heiha'auu 'Iniraaui Sae Ta'a'i
Nara 'Omesuriai Moui Grep**

(Matiu 21:33-46; Luk 20:9-19)

12 ¹Na'i 'ohasi, 'ia Jisas 'a maania ro'u tanaraaui saemaua adaa'i Jiu i ha'atee heiha'auuni. 'A o'ani 'iniraaui, “‘E sae na hasiai moui grep. 'A bara garia ma tagoraai dora 'ana'i rosirosi grep na'iei 'ana'i tagora waen. Ma ha'a-urasia ro'u i ruma ahaaha 'ana'i 'ome'ome 'ini'i maeronga. Na'i muri 'agu sadoi'i sae 'ana'i tau'aro maedi hua 'ana'i 'omesuriai mou ma hano na awa na'i kantri he'ete'i.

²“Ma na'i 'oha na tari madoraa 'ana'i husi'i hua, na saesi 'agu ha'ataaria 'ari noni tatau'aro ana 'ana'i waa mai hua narau ga'i haa'i tanaa baaniai moui grep anasi. ³Na'i 'oha na ataha wou, 'iraaui mwane narau 'omesuriai mousi rau daua marau ngahu ngahua moi, marau ha'ataaria aho'i 'ari ha'i pwaranga. ⁴'Ari wou mana nei na to'oraai mou 'a ha'ataaria ro'u i ta'i sae tatau'aro ana 'ana'i waa mai tanaa hua ana'i. Miraaui sae 'isi rau ngahuia ro'u. Rau ha'amaaraai bwauna mara here ha'ataa'ia di'u ro'u. ⁵'Ari wou mana nei na to'oraai mou, 'a ha'ataaria ro'u 'ari ta'i sae tatau'aro ana. Miraaui sae 'isi rau ngahu ha'amaesia moi. Mwane sae tatau'aro ana'i na ha'ataari'i ra here osia'i hako. Ra'i nei ra ngahu ha'ataa'ii ma ra'i nei ra ngahu ha'amaesi'i.

⁶“Na nei nagu awa mau 'ana'i ha'ataaria, naasi huunai gare ana'a na ta'ahia di'u. Naasi'a i sae ha'ahako 'ana'i ha'ataaria 'ari. Ma 'adoma'inia do 'iia rai ha'ahoua. Naasi, maagu ha'ataaria 'ari.

7[“]Oha narau re'ia, rau ha'atee hairiu o'ani, 'Naasia mo'o naigu to'oraai mousi na'i 'oha nai mae amana. Gau magai ngahu ha'amaesia magai to'ora nagaau i moui grepisi.' 8Marau daua, rau ngahu ha'amaesia marau gaasia hura'a baaniai mou.”

9[’]Ia Jisas 'agu songa'iniraaui o'ani, “Mou 'adoma'inia do'e taha naigu haa i sae na to'oraai mousi. 'Iia 'ai boi, mai ngahu ha'amaesiraaui hako'i sae 'isi mai wateai mousi tanaraau tara'i nei ro'u. 10Mou ai'a 'oha'inia gasi taha nara usua na'i Usu-usu Maea na o'ani,

'Na hau na 'iraaui sae tatau'aro ruma rau 'itaa,
naia naagu ha'i hau na ororiu di'u na'i bani anai ruma.

11 'Ia Araha God na haua do 'ai o'asi,
magau wa'ewa'e di'u 'inia!’”†

12Na ha'atee heihau'auu ana Jisas 'a to'iraaui saemaua adaa'i Jiu. Rau raba daua Jisas dorai ha'a-mama'aia. Maraagu ai'a haua, suria rau magugu do ra gasigu ha'agogoru i noni. Naasi raugu hano'a baania.

Ra Hauai Heisonga'i 'Iniai Hori Takisi

(Matiu 22:15-22; Luk 20:20-26)

13Na'i muri, 'iraaui Farisei mana sae ana'ia Herod ra ha'a-taariraaui wou tara'i sae 'anai songa'inia Jisas do neina 'ai ha'atee ha'ata'aia'i mwaeraha raha adaui Rom. 14Rau 'ari wou beia marau o'ani 'inia, “Ha'ausuri, meu 'iraraa dona mwane maho na'o 'unu'i ra odo-odo mara ha'a-momori hako. Ma'o ha'ausuriraaui noni 'ini'i taha 'ia God na 'irisia'i noni 'anai haa. Ma na'i 'oha na'o ha'ausuriraaui, rei'uaa na 'e sae he'ua nara bahurongo'o, mana ha'ausuringa'i amu'i ra ta'isada moi. Hoita, 'oi 'unua tana'ameu, 'A 'ua? Na'i ringeringe agaau, 'a odo-odo dogai hori takisi tanaai mwaeraha raha na'i Rom ma'ua ai'a?”

15[’]Ia Jisas 'a bwane 'iraraa do rau raba ha'imaania, maagu o'ani, “Ni 'uaana na mou raba ha'a-bweubweu'auu 'anai 'unuai maho na taritari'a? Moisu waa mai ta korai ha'a ma wai re'ia!” 16Marau waa wou tanaai korai ha'a, maagu songa'iniraaui o'ani, “I atana tei mana nununa tei na awa na'i korai ha'ani?” Miraaui aramia o'ani, “Na atana'i Mwaeraha adaui Rom mana nununa.”

17Mia Jisas 'a o'ani 'iniraaui, “Onaa na o'asi mamoi haua tanaai Mwaeraha i taha 'iia na to'oraai, mamoi haua tanaa God taha 'ia God na to'oraai.” Miraaui heimwaota'i di'u 'inia Jisas.

Heisonga'i 'Iniai Suruta'e Aho'i

'Anai Ohongia Jisas

(Matiu 22:23-33; Luk 20:27-40)

18Ma na'i muri, ra'i Sadiusi ra boi beia Jisas. 'Iraausi rau ai'a hinihinia do 'iraaui noni rai suruta'e aho'i baaniai mae, miraaui songa'inia Jisas o'ani,

19“Ha'ausuri, 'ia Moses 'a nugaai Ha'atora tanagaau do 'onaa 'e sae ha'iwai nai mae baaniai urao ana mararu ai'a to'o gare, na do'orana 'ai orisia, maai waina ro'u i uraosi. Mana gare na rarui to'ora'i, rai 'unuu'i 'ini'i gare ana'i do'orana na maesi, neina burungana 'a bwa'i matai hako.”[†]

20“E heiha'auu naani. 'E ta'i 'oha 'e biu ha'ido'orada narau awa wou, mana gare na hutai na'o 'a ha'iwai. Raru ai'a to'o gare mau i urao anasi ma mae'a baania. 21Na'i muri, do'orana na huta haisuri, 'a waina ro'u i naosi. Ma raru ai'a to'o gare mau ro'u, ma mae'a ro'u i saesi. Mana ta'i maho mausi, 'a to'o ro'u tanaai orunai do'oradaau. 22'Ari wou, 'iraau biu ha'ido'oradasi, rau waina hako'i uraosi. Ma ai'a ta ta'i 'iniraa'u naigu to'oraa ta gare beia, marau mae hako'a. Na'i muri mana uraosi 'a mae ro'u. 23Hoita, na'i 'oha na 'iraau biu ha'ido'oradasi rau waina hako o'asi uraosi, 'iatei 'iniraa'u nararugui ha'iwai uraosi na'i 'oha na 'ia God 'aigui ha'a-suruta'eraau aho'i baaniai mae?”

24Mia Jisas 'a aramiraa'u o'ani, “Mou taritari'a ha'atai! 'I'amou ai'a aidangisiai Usu-usu Maea mamou ai'a aidangisia ro'u i taha na mena ana God 'ai matai haua. Naia namou to'oraa 'inia 'ado'ado bweubweu'asi. 25'Oha 'ia God 'ai ha'a-suruta'era'i noni baaniai mae, 'a bwa'i sae nai ha'iwai. 'Iraau rai 'onaairaaui enjel na'i aro nara ai'a ha'iwai. 26'Io, ma wai ha'a-aidangisi'amou ro'u 'iniai suruta'e aho'i. Mou bwani 'iraraa do na'i mamaani 'inia Moses mana gere hasi'ei na noroi uruna ani, 'ia God 'a ha'atee o'ani 'inia Moses, ‘Inau God ana Ebrahim, mia Aisak, mia Jekop.’[†] 27Mana God naasi, ai'a God adaau nei ra mae, me 'e God adaau nei ra tahi. Naasi 'a ha'ata'inia doni waira orusi rau tahi mau, rei'uaa narau bwane mae. 'I'amoui Sadiusi mou taritari'a di'u 'oha mou 'unua do gau bwa'i suruta'e aho'i.”

Ha'atora Na Ororiu Di'u

(Matiu 22:34-40; Luk 10:25-28)

28'Oha 'iraau Sadiusi rau heitohetohe mau beia Jisas, 'e nei 'iniraaui Ha'ausuri 'anai Ringe ana'ia Moses, 'a boi ma rongoa dona heiarami ana Jisas 'a odo-odo. Maagu songa'inia ro'u o'ani, “Ha'atora he'ua na ororiu di'u?”

29Mia Jisas 'agu aramia o'ani, “'Ia Moses 'a 'unua o'ani, ‘I'amou sae ni Israel, moi bahu-bahurongo goro! 'Ia God naasi Araha agaau, me 'iia moi naasi ta'i God. 30Moi ta'ahiai Araha God amoo 'ini'i tahingamoo'i hako mana ahumoo'i hako me 'ini'i 'adoma'imoo'i hako mana wetewete amoo'i hako.’ Naasi nei na ororiu di'u. 31Mana ruanai Ha'atora na ororiu 'a o'ani, ‘O'i ta'ahiai nata sae 'onaai ta'ahi'o amua haari'o.’[†] 'Agu ai'a Ha'atora'a ro'u naigu ororiu di'u'ai rua Ha'atorasi.”

32Mana saesi 'a o'ani, “Ha'ausuri, 'O ha'a-momori di'u 'oha na i'oe 'o 'unua do'e ta'i God moi. 33Ma'o ha'a-momori ro'u do gai ta'ahia God 'ini'i tahingagaa'i hako mana ahugaa'i hako me 'ini'i 'adoma'igaa'i hako mana

wetewete agaa'i hako. Ma mei ta'ahiraau ro'u i mwane sae hako 'onaai ta'ahigaau haarigaau nagau haua. Na rua Ha'atorasi, raru ororiu di'u'i tara'i Ha'atora nagau suri'i, 'onaai'i ho'asi nagau hahaa'i na'i Ruma Maea ana God."

³⁴Oha 'ia Jisas 'a rongoa dona saesi 'a heiarami odo-odo, 'agu o'ani 'inia, "Wai 'unua tana'o: I'oe 'o gaarangi ha'awatea God 'anai marungiai tahingamu." Na'i muri, 'agu ai'a ta sae'a ro'u naigu raba haa ta heisonga'i.

Heisonga'i 'Iniai Ha'atahi

(Matiu 22:41-46; Luk 20:41-44)

³⁵Na'i muri, 'oha 'ia Jisas 'a ha'ausuriraau noni na'i Ruma Maea ana God, 'a o'ani 'iniraau, "A he'ua na 'iraau'i Ha'ausuri 'anai Ringe ana'ia Moses rau 'unua dona Ha'atahi 'e warowarona Mwaeraha Deved? ³⁶'Inia 'e ta'i 'oha, na Hi'ona Maea 'a haua tanaa Deved i 'ado'ado, mia Deved 'a o'ani,

'Ia Araha God 'a ha'atee tanaai Araha agua o'ani:

'Oi heinagu na'i aba odogu

'anai heimarungi beiau,

tari 'oha wai nugaraau maerongamu

na'i bahainai heimarungi amua.'†

³⁷Na'i 'oha na 'ia Deved 'a 'unua do 'ia Ha'atahi 'e Araha ana, 'a ha'ata'inia do 'ia Araha ai'a do'e warowarona moi, ma'ata 'iia Araha ro'u ana."

Miraau'i nei na ha'ausuriraau, rau wa'ewa'e di'u 'anai bahurongo'i maho na maani'i.

Jisas 'A 'Unu Ha'ata'airaau'i Farisei

Miraau'i Ha'ausuri 'Anai Ringe

(Matiu 23:1-36; Luk 20:45-47)

³⁸Mana 'oha na ha'ausuriraau noni 'a o'ani, "Moi 'ome'ome goro 'iniraau'i Ha'ausuri 'anai Ringe ana'ia Moses! 'A goro adaa'u hano hairiu na'i maketi bei'i to'oni ororiu adaa'i do neina 'iraau'i inoni rai 'ome 'irararaau marai ha'ahouraa'u. ³⁹Na'i 'oha narau siri suri'i ruma ni ha'arahesi, mei suri'i ngau goni nara haa'i, rau 'irisia dorai heinagu moe'a suri'i dora ororiu.

⁴⁰Marau matai ha'a-bweubweu'araau'i nao 'ini'i ruma adaa'i mana maho na rau to'ora'i. Mana 'oha rai rihunga'i, rau pwari'iraau'i sae 'anai haa'i rihunga'i tewa. Moi 'iraraa dona ha'a-mama'ai 'ia God 'ai ha'arahaa ro'u wou tanaraau."

Jisas 'A Ha'ata'eta'eai

Wawate Anai Nao Na Pohara

(Luk 21:1-4)

⁴¹Mia Jisas 'a heinagu gaarungiai bakosi 'anai wawate na'i Ruma Maea ana God. 'A wana suriraau'i sae nara sisiri mai 'anai nuga'i bane adaa'i. 'A 'omesia do'a ragoi sae toto'ora na rau nuga'i mwane ha'a. ⁴²'Agu 'ome, ma 'e

ta'i nao pohara na boi ma nugaa dioi rua gere korai ha'a. 'Onaa rai ha'igoni'i 'a ga'i arariai ta'i sereni. ⁴³Mia Jisas 'agu 'unuraau mai rongoiusuri ana'i ma o'ani, "Inau wai 'unua ha'a-momori tana'amou: Na naosi 'a nuga ha'a di'uraau hako i mwane sae 'isi. ⁴⁴Inia 'iraaui mwane sae 'isi rau hisu 'ini'i taha nara madara suri'i toto'ora adaa'i. Mana uraosi, 'oha na wateai ha'a na to'oraa, 'agu ai'a to'oraa'a ro'u tanei."

Jisas 'A 'Unua Dona Ruma Maea Ana God Rai Ha'ata'aia

(*Matiu 24:1-2; Luk 21:5-6*)

13 ¹Oha Jisas 'a hura'a baaniai Ruma Maea ana God, 'e ta'i 'iniraaui rongoiusuri ana'i 'a boi beia ma o'ani 'inia, "Ha'ausuri, 'osui re'i'i kae hau suri'i bani 'anai kae Ruma Maea 'omegorosi."

²Mia Jisas 'a o'ani 'inia, "O 'iraraa? 'E 'oha nai boi mau na bwa'i ta ta'i hau 'ini'i hau 'isi naraigui awa suri'i dora nara heinagu suri'isi. Na mwane hau 'isi rai gaasi'i dio."

Ha'abasu 'ini'i Maho Ta'a'i Narai Siri Mai

(*Matiu 24:3-14; Luk 21:7-19*)

³Na'i muri, 'ia Jisas 'a heinagu na'i hungahungai 'Oliv. Na'i dorasi ra matai wanasia moi 'ari Ruma Maea ana God. Mia Pita, Jems, Jon, mea Andru rau boi haariraaui beia, marau songa'inia o'ani, ⁴"Na'i 'oha he'ua na rai kai'ai Ruma Maeasi? 'E ha'ara he'ua na mei re'ia na meigu 'iraraa 'inia do 'a tari'a i madoraa 'ana?"

⁵Mia Jisas 'a aramiraaui o'ani, "Moi 'ome'ome goro, ra gasigu ha'ateha'amou tara'i sae! ⁶Inia 'ai ragoi sae rai boi heitaroha'i na'i atagu narai o'ani, 'Iia'a ninauni,' ma 'ai ragoi nei narai ha'ateharaau 'ini'i ha'ausuringa'i adaa'i nara ai'a ha'a-momori. ⁷Moi rongo'i rongo raha suri'i hei'oi nara to'o gaarangi mana taroha 'ini'i nei ra to'o ha'ataui. Ma 'ai abui ta'aabemoou. 'Inia mareho 'isi rai to'o o'asi'a, ma ai'a do naasi'a i ha'ahakona dangi. ⁸Iraaui sae na'i ta'i kantri rai 'ari marai heingahui beiraaui sae na'i nata kantri. Ra'i nunu rai to'o suri'i tara'i dora, ma tara'i dora na inoni rai mae 'inia hioro. Maho 'isi 'e taraawa'adi moi rongomaata'i, 'onaai urao naagu taraawa'a maesi ahu 'anai ha'ahutaai gare.

⁹"Moi 'ome'ome goro! 'Inia rai boi wai'amou 'anai 'i'i'amou marai rohoroho'amou suri'i ruma ni ha'arahesi adaa'i. Suria 'i'amou ra'i rongoiusuri agu'i, rai wai'amou 'anai ha'a-urasi'amou na'i maadi Primia mana Mwaeraha. Naasi madoraa amoo 'anai taroha'inia hura'a i Taroha Goro tanaraau. ¹⁰Na Taroha Goro rai 'adara'inia hako 'ari suriai marewana, maigu tari ha'ahakonai dangi. ¹¹Hoita, 'oha rai wai'amou 'anai 'i'i'amou, moi abui 'adoma'i raha 'ini'i taha na moi maani'i. 'Inia na maho namoi 'unu'i rai ha'ata'ini'i tana'amou suri'i 'adoma'imoo'i na'i madoraa na moi ha'atee. Na maho na moi maani'i, ai'a 'ado'adomoo'i haarimooi mei baaniai Hi'ona Maea.

¹²"Na'i 'ohasi, sae rai usuha'ini'i do'oradaa'i mana gare adaa'i nara hinihiniau tanaraui nei nara raba ha'amaesiraaui. Mana gare rai ha'imae

bei'i amadaa'i mana inadaa'i marai usuha'iniraau ro'u tanaraaui nei rai ha'amaesiraau. ¹³Iraaui noni rai 'utai'amou, suria 'i'amou ra'i rongoiusuri agu'i. Ma 'onaa moi ura baabau tari ha'ahakonai madoraa ta'aasi, moigu daua namooui tahi tarau."

**Jisas 'A Maaniai Taha Nai To'o
Na'i Jerusalem**

(Matiu 24:15-28; Luk 21:20-24)

¹⁴Mia Jisas 'a o'ani ro'u 'iniraau, "I'amou moi re'iai maho ta'aa di'u na 'ia God 'a 'itaa. 'Ai ha'ata'aiiai Ruma Maea ana God, 'inia 'a ga'i bwa'i awa iei. 'Ia tei na'oi 'oha'iniiai ha'ateeni, 'oi ha'imaania aidangisia ma'ata'a i 'ado'ado 'ana! Hoita, 'onaa 'oi awa na'i Provensi Jiudea na'i madoraasi, 'oi hora ta'eha suri'i hungahunga 'anai bainihu. ¹⁵'Onaa 'oi awa hura'ai buriinai ruma amua, 'oi hora'a. 'Ogui abu siri ro'u i ruma 'anai waa'i tara'i maho amu'i. ¹⁶'Onaa 'oi awa na'i mou amua, 'oi abui aho'i 'ari ruma 'anai hauai bwana amua. ¹⁷Ha'a-arohai'araau di'u i urao ra pote mana hasuuri'i, 'inia 'ai bwara tanaraaui hora. ¹⁸Moi ha'arahesi mana mahosi 'ai abui to'o na'i 'oha na rangi ro'aro'a. ¹⁹Inia ni rongomaata'i na'i madoraasi, 'ai ta'aa di'u baani'i mwane rongomaata'i nara taraawa'a mau na'i madoraa na ha'apwa'araa God i marewana tari dangini. Ma na'i muri, 'a bwa'i ta madoraa ta'aa o'asi'a ro'u naigu to'o. ²⁰'Onaa 'ia Araha God 'ai abui ha'apwapwakuai madoraa 'anai rongomaata'i 'isi, 'a bwa'i nei 'aigu tahi. Me 'inia ta'ahiraau ana 'i sae ana'i na bwane 'ome sigihiraau, naia naigui ha'apwakua 'inia i madoraasi. ²¹'Onaa ta sae nai o'ani, 'Moisu wana mai. Naani Ha'atahi!' Ma'uasi 'ai o'ani, 'Na 'ariani!' Moi abui hinihinia. ²²Ra'i sae pwapwaaari'i rai boi marai o'ani, 'Inau naasi huunai Ha'atahi,' ma'uasi rai o'ani, 'Inau naasi huunai Ra'abea.' Rai haa'i mwani ha'abu'oahu 'anai ha'ateharaau sae. Rau raba ha'ateharaau ro'u i nei na 'ia God 'a bwane 'ome sigihira maagu bwara. ²³Moi 'ome'ome goro 'iniraau! Naia nau 'unu'i'a 'ini'i maho 'isi tana'amousi."

Jisas 'A Maaniai Boi Aho'i Nai Haa

(Matiu 24:29-31; Luk 21:25-28)

²⁴Ia Jisas 'a ha'atee o'ani ro'u, "Na'i murinai madoraa ta'aasi,
 'I sina 'a bwa'i marewa,
 mana hura 'ai o'asi ro'u.
²⁵I hee'u rai ahoda,
 mana taraani maho na'i ahoasara rai 'iha'iha.'[†]
²⁶Miraau noni raigu re'iau i Gare'i Inoni. Wai boi aho'i suri'i ro'odo beiai raraha mana mena na wetewete. ²⁷Me 'inau waigu ha'a-taariraau enjel agu'i 'ari suri'i mwani dora hako na'i marewana 'anai taragoniraau mai nei na 'ia God 'a bwane 'ome sigihiraau."

Ha'ausuringa'i Baaniai Hasi'e'i**Nara 'Unua 'Iniai Fig***(Matiu 24:32-44; Luk 21:29-33)*

28 Mia Jisas 'a o'ani ro'u, “Moisu 'adoma'iniai fig mai ha'ausuri'amou. Na'i 'oha na'o re'iai raraanai fig ra taraawa'ai asuru mana rawa ra pwira, ma'o 'iraraa do madoraa raorao 'a gaarangi'a. 29'A o'asi ro'u. 'Oha na maho ta'a'i 'isi rai to'o, mamou 'iraraa do 'inau gaarangi aho'i mai'a. 30'Inau wai 'unua ha'a-momori tana'amou, mareho 'isi rai to'o, miraaui sae nara awa na'i madoraani ra bwa'i mae mau. 31I ahoasara mana ano rarui anoro mana ha'atee agu'i rai awa tarau.

32“Na dangi mana madoraa he'ua nawai aho'i mai ai'a ta sae nai 'iraraa. Rei'uaa 'inau i Gare'i Inoni miraaui enjel na'i aro mameu ai'a 'iraraa ro'u. 'Ia moia Amagu na 'iraraa. 33Naasi, moi 'ome'ome mamoi ha'aagau goro, 'inia mou ai'a 'iraraai madoraa na wai aho'i mai. 34Na boi aho'i na wai haua, 'a 'onaai sae na ha'aagau 'anai 'aariha ana. Na saesi 'a ha'a-'u'uriraaui sae tatau'aro ana'i 'ini 'omesuriai ruma ana. 'A 'unu'i tanaraau tau'aro narai haa'i ma nugaai sae na'i maraaruma 'anai 'ome'ome goro 'iniai madoraa nai aho'i mai. 35-36Naasi moi 'ome'ome goro! 'Inia mou ai'a 'iraraai madoraa wai boi aho'i 'onaai ai'a 'iraraa adaau'i 'oha nai boi aho'i anai sae na to'oraai ruma. Mou gasi mauru ma moigu 'asu'a 'oha wai boi aho'i. Na'i gasi su'urahi, ma'ua na'i 'ubutanai rodo, ma'ua na'i gasi wa'aria ma'ua haho'oa. 37Taha nau 'unua tana'amou 'au 'unua ro'u tanaraau hakoi mwani noni. Moi 'ome'ome goro!”

'E Ha'aradorado 'Anai Ngahuia Jisas*(Matiu 26:1-5; Luk 22:1-2; Jon 11:45-53)*

14 1Ma'e rua dangi na mau maraigu ha'ato'oa 'e rua rongo. 'Etana 'anai 'adoma'i aho'isiai Roho Aharau mana ruanai rongo ra 'unua 'iniai Rongo 'ini Bredi nara ai'a dorari'i beiai draebam.

Hoita, 'iraaui na Na'ohadaa'i Piriisi miraaui Ha'ausuri 'anai Ringe ana'ia Moses, rau siba herehere do neina 'iraaui sae rai abui 'iraraai madoraa rai daua Jisas 'anai ha'amaesia. 2Rau o'ani, “Gai abui daua suri'i dangi nagau haai rongo, 'inia 'iraaui sae ra gasi ha'ato'oa ta ha'agogoru.”

'E Urao Na Ringisiai Rumu**Na'i Bwauna Jisas Na'i Betani***(Matiu 26:6-16; Luk 22:3-6; Jon 12:1-8)*

3'Ia Jisas 'a awa na'i 'omaai Betani na'i ruma ana Saemon. 'Ia Saemon 'e sae na adoia ga'tui daoha ra 'unua 'iniai lepa. Na'i 'oha rau ngau, 'e urao na siri mai beiai gere huai wai 'ome'ome goro na honu 'ini rumu na hori bwara ma si'ini goro. 'A tahangia ma ringisia na'i bwauna Jisas.

4Mana haru tara'i sae na'i rumasi rau taesu'a 'anai uraosi marau ha'atee hairiu o'ani, “Ei, 'a 'ua na ha'agata'inia 'inia i rumusi? 5'A ga'i raonga'inia, mana ha'a 'ana 'a ga'i 'a'auhiraau 'inia i pohara. Na rumusi ra ga'i horia

'inia oru 'arangi korai ha'a madara!" Maraugu taraawa'a ha'atee ha'ata'aiia uraosi.

⁶Mia Jisas 'agu o'ani 'iniraa, "Nigaa! 'A 'ua na mou ha'atee ha'ata'aiia 'inia? 'Iia 'a haua tanaau i here na goro. ⁷Iraaui pohara rai awa tarau moi bei'amou, mamoi matai 'a'auhiraau na moi wou ta madoraa. Me 'inuu 'au bwa'i awa tarau bei'amou. ⁸Na uraoni 'a hauai here na goro tanaau. 'A ha'aagauai abegu 'anai 'oha rai toringiau. ⁹Wai 'unua ha'a-momori tana'amou: Suri'i mwane dora na'i marewana narai taroha'inia ei Taroha Goro, rai maaniai taha na haua i uraoni, marai 'adoma'inia aho'i."

¹⁰Mia Jiudas Iskariot, 'e ta'i 'iniraaui rongoiusuri ana'ia Jisas, 'a 'ari beiraui Na'ohadaa'i Piriisi ma 'unua do 'iia 'ai 'a'auhiraau 'anai sadoia ta here narai matai daua 'inia Jisas. ¹¹Na'i 'oha narau rongoa do'ai 'a'auhiraau, rau wa'ewa'e di'u. Marau duruduru tanaa dorai taharia. Ma na'i 'ohasi, 'ia Jiudas 'a taraawa'a sibasiba madoraa goro 'anai usuha'inia Jisas tanaraau.

Jisas 'A Ngau Beiraui Rongoiusuri Ana'i

(Matiu 26:17-30; Luk 22:7-23; Jon 13:21-30)

¹²Na'i dangi tahamora 'ini'i dangi nara ha'ato'oai Rongo 'ini Bredi nara ai'a dorari'i beiai draebam, ra ngahui'i tara'i garei siip 'anai 'adoma'i aho'isiai Roho Aharau. Ma na'i dangisi, 'iraui rongoiusuri ana'ia Jisas rau boi songa'inia o'ani, "Na'i hei na'o rabasia do mei ha'aagaua iei ngaugoni 'anai 'adoma'i aho'isiai Roho Aharau?"

¹³Mia Jisas 'agu o'ani 'inia waira rua 'ini'i rongoiusuri ana'i, "Murui hano ma murui 'ari na'i kae 'omaai Jerusalem. Ma na'i 'oha na murui ataha wou, murugui heisadoi beia ta sae nai suru'iai bei wai. Ma na'i 'oha murui re'ia, murui suria na'i dora nai 'ari iei. ¹⁴Na'i 'oha nai siri na'i ruma, murui songa'inia sae na to'oraai rumasi. Murui o'ani, 'I Ha'ausuri ameeu 'a raba 'iraraa, na hei ahii nai matai ngau iei beiraui rongoiusuri ana'i 'anai 'adoma'i aho'isiai Roho Aharau?" ¹⁵Na sae na to'oraai rumasi, 'aigu wai'amurua ta'eha 'anai 'omesiai ahii nara bwane ha'a-arataraa mana mwani maho ra bwane agau. Na'isi na murui ha'aagauhi'i ei mwane mareho."

¹⁶Miraruai rua rongoiusuri raru 'ari ma raru 'omesia dona mwani maho ra to'o 'onaai bwane 'unua ana Jisas tanararu. Mararu ha'aagauai ngaugoni 'anai 'adoma'i aho'isiai Roho Aharau na'i rumasi. ¹⁷⁻¹⁸Oha 'ia Jisas miraaui rongoiusuri ana'i rau ngau goni na'i su'urahisi, 'ia Jisas 'a o'ani 'iniraa, "Inau wai 'unua ha'a-momori tana'amou: 'E ta'i abe 'ini'amou namou ngau beiau 'ini, nai usuha'iniau tanaraui maerongagu." ¹⁹Oha na 'ia Jisas 'a 'unua o'asi, 'iraui rongoiusuri rau arunga ta'aa. 'E nei ma o'ani 'inia Jisas, "A 'ua? 'O 'adoma'inia do 'inau gasi?"

²⁰Mia Jisas 'a aramiraaui o'ani, "E abe 'ini'amou moi, 'ia mo'o miri ta'i toha'inia dorai bredi na'i ta'i rabo'oni. ²¹Ha'amomori. 'Inau i Gare'i Inoni, wai mae 'onaai ha'arangasia ada na'i Usu-usu Maea. Ma'ata, ha'arohaia di'u a mo'o nai usuha'iniau tanaraui maerongagu! 'A ga'i goro tanaa 'onaa 'a ga'i bwa'i huta!"

22Na'i 'oha na rau ngau, 'ia Jisas 'a dauai huai bredi. 'A ha'atee ha'agorohia God 'inia ma uubia. 'A haa tanaraau rongoiusuri ana'i ma o'ani, "Naani abegu. Moi daua mamoi ngaua."

23Mia Jisas 'a dauai panikeni waen. 'A ha'atee ha'agorohia God 'inia ma haa tanaraau rongoiusuri ana'i ma o'ani, "Moi gonohia." Miraau hako rau gono.

24Maagu o'ani ro'u 'iniraa, "Naani 'abugu 'anai ha'a-'o'oriai duruduru haoru ana God. 'Ai ahe 'iniraaui mwani noni rago. 25Nau wai 'unua ha'a-momori tana'amou: 'Agu bwa'i gonohia'a ro'u ta waen tari 'oha wai gonohiai waen haoru na'i dora ni heimarungi ana God."

26Miraau suru'iai gana marau hura'a 'anai hungahungai 'Oliv.

Pita 'A Duruduru Tanaa Jisas

(Matiu 26:31-35; Luk 22:31-34; Jon 13:36-38)

27Mia Jisas 'a o'ani 'iniraaui rongoiusuri ana'i, "I'amou hako moi nugasiau mamoi hora baaniau. 'Ai 'onaai 'unua ada na'i Usu-usu Maea o'ani,

'Ia God 'ai ha'amaesiai 'omesuri siip,
miraau siip rai 'adarara!'"

28Ma'ata na'i 'oha wai suruta'e aho'i, wai 'ari na'i na'o 'ini'amou na'i Galili. Na'i 'isi nagaigui heito'oi ei."

29'Ia Pita 'agu ha'atee raha o'ani, "Rei'uaa na 'iraaui rongoiusuri amu'isi rai nugasi'o, me 'inau 'au bwa'i moe'a!"

30Mia Jisas 'a aramia o'ani, "Pita, wai 'unua tana'o ha'a-momori: De'eni rodo i kua 'a bwa'i tataraoke ha'arua mau, mi'oe 'oi bwani tohe ha'a-oru do'o ai'a mataiau."

31Mia Pita 'a tohe baabau ma o'ani, "Inau, rei'uaa nawai mae bei'o, mau bwa'i 'unua moe'a do'au ai'a matai'o!" Miraau hako rongoiusuri rau ha'atee o'asi ro'u.

Jisas 'A Ha'arahesi Na'i Getsemanii

(Matiu 26:36-46; Luk 22:39-46)

32'Ia Jisas mana rongoiusuri ana'i rau taha na'i dora nara 'unua 'inia Getsemanii, maagu o'ani 'iniraa, "Moi heinagu mamasi 'ini 'oha wai ha'arahesi." 33Ma waia Pita, Jems mea Jon. Na'i 'ohasi 'ia Jisas 'a arunga ta'aa mana 'adoma'ina 'a kuhi, 34maagu o'ani 'iniraaui waira orusi, "Na ahutotou nau haa 'a raha di'u, mau gaarangi maesia. Moi awa na'i 'ini mamoi rarai beiau."

35-36Ma gere sara wou baaniraaui ma topira'i ruru aurui ano ma ha'arahesi, "Ama, 'onaa 'ai mwada'u, ma'ai abui to'o o'asi tanaau! Mama, bei'o ai'a maho nai bwara tana'o, 'oi abui wateau 'anai siri na'i rongomaata'ini. Ma'ata 'ai abui suriai hei'irisigu, me 'ai suriai hei'irisimu."

37'A aho'i mai ma re'iraaui waira oru, rau poru mauru moi. Mia Jisas 'a o'ani 'inia Pita, "Saemon, i'oe 'o mauru moi? 'O bwa'i gere matai rarai beiau

suria ta ta'i 'aoa moi? ³⁸Moi rarai mamoi ha'arahesi neina moi abui ahoda na'i 'oha moi siri na'i heihonghi. Ra wetewete i 'adoma'imoo'i 'anai ha'isuri'i maho ra odo-odo, mana abemoo'i naragu maemae'a."

³⁹Mia Jisas 'a aho'i 'ari ma haa ro'u mau i ta'i ha'arahesi. ⁴⁰Oha na aho'i ro'u ma re'iraau waira oru rau poru mauru moi. Ni maadaa'i ra hihi'a di'u 'iniaia mamauru'a. 'A ha'arairaa ma kakui ahudaau 'iniaia taha rai 'unua tanaa.

⁴¹Ia Jisas 'a aho'i 'ari ro'u 'ini ha'arahesi ma na'i 'oha na boi aho'i beiraa, 'a o'ani 'iniraa, "Mou mauru mamou mamaro mau? 'A goro'a ga'u! Na madoraa na rai usuha'iniau i Garee Inoni tanaraau noni ta'a'i, naani'a! ⁴²'Ome, 'ia mo'o nai usuha'iniau tanaraau maerongagu 'a boi'a. Moi ura ara'a magari 'ari beiraa."

Ra Boi 'Anai Daa Jisas

(Matiu 26:47-56; Luk 22:47-53; Jon 18:3-12)

⁴³Oha na 'ia Jisas 'a ha-hadahada mau, 'ia Jiudas, 'e ta'i 'iniraaui rongoiusuri ana'ia Jisas, 'a taha mai beiai ruruhai sae. Ra waa'i mai naihi mana hasi'ei 'anai heingahu. 'Iraau Na'ohadaa'i Piriisi mana Ha'ausuri 'anai Ringe ana'ia Moses ma tara'i saemau ro'u ra ha'a-taariraa mai. ⁴⁴Mia Jiudas 'a bwane hauai ha'a-aratara tanaraau o'ani, "Ia mo'o nawai ngoonia, naasi na moi dau ha'agorohia mamoi waia."

⁴⁵Naasi, mia Jiudas 'a 'ari odo-odo beia Jisas ma ha'atee o'ani tanaa, "Ha'ausuri" ma ngoonia. ⁴⁶Miraaugu daua 'anai waia. ⁴⁷Ma na'i 'ohasi, 'e ta'i 'iniraaui rongoiusuri na awa gaarangiraa, 'a rahiai naihi ana ma taba taahiai karinganai sae tatau'aro anai Na'ohadaaui Piriisi. ⁴⁸Mia Jisas 'a ha'atee o'ani tanaraau, "A 'ua? Mou 'adoma'inia do 'inau 'e sae hehere ta'aa na mou boi 'inia be'i naihi mana hasi'ei 'anai heingahu 'anai dauau? ⁴⁹'A 'ua namou ai'a bwani dauau 'inia na'i Ruma Maea ana God? 'Ado dangi na'i 'isi'a nau ha'ausuri na'iei. Ma'ata, mareho namougu huanisi, 'e ha'ato'oa moi mareho nara bwane usua 'iniau na'i Usu-usu Maea! Naia na mou boi dauau o'ani 'iniani."

⁵⁰Miraauui rongoiusuri rau nugasia'a Jisas marau hora hako baania.

⁵¹Ma'e sae haoru, na suria Jisas. 'Iia 'a ho'owa'a 'iniaia tahangai bwana mamae. Mana 'oha rau bonasiai daua, ⁵²'a ahodai bwana ana ma hora ha'i wa'aroko.

Jisas Ra Waia Tanaai Na'ohadaaui Piriisi

(Matiu 26:57-68; Luk 22:54-55, 63-71; Jon 18:13-14, 19-24)

⁵³Marau waia Jisas 'ari na'i ruma anai Na'ohadaaui Piriisi. Miraauui Na'ohadaa'i Piriisi miraauui Ha'ausuri 'anai Ringe ana'ia Moses ma tara'i saemau ro'u na rau awa na'i Kansol, rau goni mai hako na'i dorasi. ⁵⁴Mia Pita 'a haisuri ha'atau moi. 'A siri na'i raronai dora a'ora na'i maanai rumasi ma heinagu na'i bobonai 'eu. 'A waari'u beiraaui sae hehei'oi nara 'omesuriai Ruma Maea ana God.

⁵⁵Hoita, na'i raronai ruma, 'iraau Na'ohadaa'i Piriisi miraaui haru saemaua narau awa ro'u na'i Kansol ra bonasia do rai sadoia ta mamaani 'anai subunia 'inia Jisas marai hiiri ha'amaesia 'inia. Miraaui ai'a sadoia ta maho 'anai ha'ahunia 'inia. ⁵⁶'Inia, rei'uaa nara ragoi nei ra haa'i mamaani pwar'i 'ana Jisas, me ni mamaani adaa'i ra ai'a ta'isada. ⁵⁷Ra ura ara'a ro'u tara'i nei ma ra haua ro'u i pwar'i. Rau o'ani, ⁵⁸"I'ameu meu rongoa do 'ai kaii Ruma Maea ana God 'iraau sae rau tau'aronasi. Ma 'unua do 'ai ha'a-urasia aho'i ta nei haoru na'i moi oru dangi, 'e nei na bwa'i sae nai matai tau'arona!" ⁵⁹Ma'ata na mamaani adaa'i ra he'ete'i hairiu mau.

⁶⁰Mana Na'ohadaaui Piriisi 'a ura ara'a na'i maadaaui sae 'isi, ma ha'atee o'ani tanaa Jisas, "A 'ua? 'O bwa'i haua ta heiarami 'ini'i mareho ra ha'ahunio 'ini'isi?"

⁶¹'Ia Jisas 'a papaku ma ai'a 'unua ta ta'i ha'atee. Mana Na'ohadaa'i Piriisi 'a songa'inia o'ani ro'u, "A 'ua? I'oe naasi Ha'atahi, garena God?" ⁶²Jisas 'a aramia o'ani, "Io. 'Inau! 'Inau, na Gare'i Inoni, moi re'iau mau, 'oha wai heinagu na'i dora ororiu na'i aba odona God[†] huunai mena. Wai aho'i mai hungadi rorodo na'i aro!"

⁶³Mana Na'ohadaaui Piriisi 'a karia i to'oni ana haaria 'anai ha'ata'ini'ai 'ado'adona doni mareho na haua Jisas 'a ta'aa di'u. Ma o'ani, "Gaugu bwa'i sibania'a ro'u ta sae 'anai ha'ahunia 'inia ta maho ro'u. ⁶⁴Naia mou rongoa'a haarimooi, 'a ha'atee ha'ata'aia God! Mou 'adoma'i he'ua?"

Marau aramia o'ani, "A arari do rai ha'amaesia!" ⁶⁵Maraugu ngisuai abena, ma tara'i nei rau bibii bwarasai maana marau rubu'ia 'ini'i rimadaa'i marau ha'atee o'ani, "O'i 'unua tana'ameu mo'o na rubu'i'osi! 'Inia i'oe 'e rarabea, nita?" Ma na'i 'ohasi na sae hehei'oi nara 'omesuriai Ruma Maea ana God rau waia marau hidaria ro'u.

Pita 'A Tohea Jisas

(*Matiu 26:69-75; Luk 22:56-62; Jon 18:15-18, 25-27*)

⁶⁶Na'i mau 'oha ra hiiria Jisas, 'ia Pita 'a heinagu mau na'i dora a'ora na'i maanai ruma. Na'i 'ohasi 'e gere urao na tau'aro tanaa Na'ohadaaui Piriisi 'a boi. ⁶⁷Oha na 'omesiai wawaari'u ana Pita na'i 'eu, 'a wana wetewete 'inia ma o'ani, "I'oe ro'usi beia Jisas ni Nasaret!"

⁶⁸Me 'iia 'a o'ani 'inia, "O pwar'i na! Nau ai'a 'iraraai maho na'o 'unuasi!" Mia Pita 'a suruta'e ma gere hura'a wou na'i maanai bara, mana kua 'a tataraoe.

⁶⁹Mana gere uraosi 'a 'omesia ro'ua Pita, ma ha'atee o'ani tanaraaui sae rau awa 'isi, 'a o'ani, "E ta'i abe 'iniraaui ro'u naasi!" ⁷⁰Mia Pita 'a o'ani ro'u, "Ai'a, 'inau ai'a!"

'A ai'a orea miraaui sae rau ura na'isi rau o'ani ro'u 'inia Pita, "Ha'amomori, i'oe 'e ta'i ro'u 'iniraaui. Meu 'iraraa do i'oe 'e sae ni Galili ro'u."

^{14:62} *Aba odona God:* Dorasi 'a ha'ata'inia do 'ia Jisas 'ai heimarungi goni beia God. Beiraaui sae ni Jiu "aba odo" 'e dora hauasa ma ra ha'ahouai sae na awa ei.

71'Ia Pita 'a tohe baabau 'a o'ani, "Ha'amomori beia God! 'Inau ai'a 'iraraa mora a mo'o namou 'unuasi! 'Onaa wai pwari'i 'ia God 'ai ha'a-mama'aiau!"

72'Na'i mau madoraasi mana kua 'a ruana'ai tataraoke. Mia Pita 'agu 'adoma'i aho'isi'i ha'atee na 'unu'i a Jisas tanaa, 'a o'ani, "Na kua 'a bwa'i tataraoke ha'arua mau, ma'oi 'unua ha'a-oru'a do 'o ai'a 'iraraa." 'A 'adoma'i aho'isia magu angi.

Ra Waia Jisas Tanaa Paelat

(*Matiu 27:1-2, 11-14; Luk 23:1-5; Jon 18:28-38*)

15 ¹Na'i mau haho'oa ta'aa, 'iraaui saemaua na'i Kansol rau goni aho'i hako marau hauai ta'i 'ado'ado 'ini'ai here rai haa 'ana Jisas. Naasi marau ho'osi'i rimana Jisas marau waia 'ari tanaa Paelat, na Primia 'anai Provens. ²Mia Paelat 'a songa'inia Jisas o'ani, "A 'ua? I'oe naasi mwaeraha adaau Jiu?"

Jisas 'a aramia o'ani, "Naia na'o 'unuasi."

³Miraaui Na'ohadaa'i Piriisi rau subunia 'ini'i mwani maho ta'a'i. ⁴Naasi mia Paelat 'a songa'inia aho'i ro'ua Jisas, 'a o'ani "O rongo'i maho rau subuni'o 'ini'isi? 'A 'ua? 'A bwa'i maho na'oi 'unua?"

⁵Mia Jisas 'agu ai'a 'unua'a ta ta'i ha'atee mia Paelat 'a heimwaota'i di'u.

Paelat 'A Hiiria Jisas

(*Matiu 27:15-26; Luk 23:13-25; Jon 18:39—19:16*)

⁶'Ado harisi, 'oha 'iraaui Jiu ra ha'ato'oai rongo 'anai 'adoma'i aho'isiai Roho Aharau, 'ia Paelat 'a matai ha'awatea tanaraau ta sae narai 'irisia ma'ai ha'ahura'ahia baaniai rumaniho'o. ⁷Hoita, na'i madoraa narau hiiria Jisas, ra'i sae nara awa na'i rumaniho'o, 'inia rau ngahu ha'amaesi'i sae na'i madoraa na rau bonasia ha'ahakoai heimarungi adaau Rom. Ma'e ta'i 'iniraaui naasia Barabas. ⁸Miraaui Jiu rau boi 'anai ha'angonia Paelat do'ai ruhasia ta sae 'onaai bwane hahaua ana. ⁹Mia Paelat 'a o'ani 'iniraaui, "A 'ua? Mou 'irisia dowai ruhasiai mwaeraha amooi Jiu?" ¹⁰'Ia Paelat 'a ha'atee o'asi suria 'a bwane 'iraraa do 'iraaui Na'ohadaa'i Piriisi rau waia maia Jisas suria rau kakawa 'omesia 'ini'ai rago anai sae nara ta'ahia.

¹¹Miraaui Na'ohadaa'i Piriisi rau ha'angoniraaui wetewete inoni dorai 'unua tanaa Paelat 'anai ruhasia Barabas, 'ia Jisas 'ai abu. ¹²Mia Paelat 'a songa'iniraaui hakoi noni o'ani, "Mawai ha'ahe'uaa mo'o na mou 'unuasi do 'iia 'e mwaeraha amooi Jiu?"

¹³Marau awara o'ani, "Rabu ahita'inia na'i dadaahoro!"

¹⁴Mia Paelat 'a songa'iniraaui o'ani, "Iniai 'uaana? 'E 'ino he'ua na haa?" Marau awara raha ro'u o'ani, "Rabu ahita'inia na'i dadaahoro!"

¹⁵Mia Paelat 'a ruhasia Barabas, suria 'a rabasia do 'ai aroi ahudaa'i. Ma 'unua tanaraaui sae hehei'oi ana'i dorai rohoa Jisas 'ini'ai hasiwaro baabau marai waia hura'a 'anai rabua na'i dadaahoro.

'Iraaui Hehei'oi Ra Haikou 'Inia Jisas

(*Matiu 27:27-31; Jon 19:2-3*)

¹⁶Miraaui hehei'oi rau waia Jisas siri na'i kae ruma raha ana Paelat. Marau 'unuraaui ro'u hako mai sae hehei'oi na'i ruruha adaau. ¹⁷Marau

ha'ato'onia Jisas 'onaai mwaeraha 'inia'i to'oni tewa wangawanga. Marau nugaa na'i bwauna i hihiri bwau nara haa 'inia'i warorarak. ¹⁸Marau ha'atotooa, rau o'ani, "Ha'aasaa'i mwaeraha adaau'i Jiu!" ¹⁹Rau rubu'iai bwauna 'inia'i hasi'ei, rau ngisuai abena marau topira'i ruru tanaa do rau ha'ahoua. ²⁰Na'i 'oha rau ha'ada'ada'a hako 'inia rau rahia aho'i to'oni wangawanga narau ha'ato'onia 'inia marau ha'ato'onia aho'i 'inia to'oni ana maraugu waia 'ari 'anai rabua na'i dadaahoro.

Ra Rabu Ahita'inia Jisas Na'i Dadaahoro

(*Matu 27:32-44; Luk 23:26-43; Jon 19:17-27*)

²¹Oha rau 'ari wou suriai tara na'i Jerusalem, rau heisadoi beiai sae na atana 'ia Saemon. 'Iia 'e sae ni 'omaai Saerin me 'iiasi 'e amana Aleksanda mea Rufas. 'Agu boi baaniai dora na gere ha'atau baaniai 'omaasi ma riutaha mai ro'u na'i tarasi. 'Iraau hehei'oi rau ha'a-'usu'usua do 'ai suru'iai dadaahoro baania Jisas. ²²Rau waia Jisas 'ari na'i dora ra 'unua 'inia'i Golgota mana 'ado'ado 'ana, "E Dora ni Korai Bwau Sae." ²³Marau haua tanaai waen ra doraria 'inia'i merisini na ra 'unua 'inia "myrrh" 'anai ha'amaadidi'i dora ra maata'i. Mia Jisas 'a ai'a raba gonohia. ²⁴Miraau sae hehei'oi rau rabu ahita'inia Jisas na'i dadaahoro. Rau gaasi ha'ara 'anai sadoia tei 'inirau nai to'ora'i to'oni ana'i. ²⁵Mana'i madoraa 'onaai angi siwa na'i haho'oa na rau rabu ahita'inia Jisas na'i dadaahoro. ²⁶Mara usuai usu-usu na'i baba mara nugaa na'i bwaunai dadaahoro 'anai ha'ata'inia'i taha na ha'atari'aa. Rau usua o'ani,

MWAERAHA ADAAU'I JIU

²⁷Ma'e waira rua sae beriberi narau rabu ahita'iniraru ro'u suri'i dadaahoro. Ta nei na'i aba odo 'inia Jisas ma ta nei na'i aba maha. ²⁸'A to'o o'asi do 'ai to'o ha'a-momori taha na ra usua na'i Usu-usu Maea, "Iraau sae ra 'unua do 'iia 'e ta'i abe 'inirau sae hehere ta'aa."†

²⁹Miraau sae ra taha horo 'isi rau ha'atee ha'ata'aia, rau arabwau 'ini ha'atotooa marau o'ani, "Mmm naasi, i'oe na'o 'unua ani do'oi kaii Ruma Maea ana God ma'oi matai ha'a-urasia aho'i na'i raronai oru dangi. ³⁰'Onaa 'o to'o mena o'asi, 'o ga'i ha'atahi'o haari'o ma 'oi dio mai baaniai dadaahorosi."

³¹'Iraau ro'u na Ha'ausuri 'anai Ringe ana'ia Moses mirau Na'ohadaa'i Piriisi rau haikou 'inia. Rau ha'atee hairiu o'ani, "Sae he'ete'i 'a matai ha'atahi'i, me 'iia 'a bwa'i matai ha'atahia haaria. ³²'A 'ua? Naia naasi Ha'atahi, mwaeraha adaau'i Jiu? 'Onaa gai 'omesiai dio mai ana baaniai dadaahoro ma gaigu hinihini'i ha'atee ana'i."

Mana waira rua ra rabu ahita'ini'araru beia Jisas, raru ha'atee ha'ata'aia ro'u.

Na Mae Ana Jisas

(*Matu 27:45-56; Luk 23:44-49; Jon 19:28-30*)

³³Ma na'i angi ta'i tangahuru mana rua na'i dangisi, 'a kuhi bwarasaii kantri hako tari na'i angi oru. ³⁴Na'i angi oru abaidangi 'ia Jisas 'a totoro

15:28 Tara'i Baebol bwani ra'a ai'a to'oraai tatara 'e 28.

o'ani na'i ha'atee ana, “Elai, 'Elai, lama sabaktani?” Na 'ado'ado 'anai ha'ateesi, 'a o'ani, “God agua! God agua! 'Ini 'uaana na'o gagata'iniau 'inia?”

³⁵Ma tara'i nei nara ura gaarangi, rau rongoai awara o'asi ana marau o'ani, “Ei, 'a kukua Elaija.” ³⁶Ma 'eba i ta'i sae ma dauai mareho na matai omi'i wai, ma ha'ahonua 'iniai waen mahai. 'A nugaa na'i hasi'e'i ma taranga'inia ara'a tanaa Jisas do 'ai gonohia. Mana saesi 'a o'ani, “Gai 'ome'ome ga'u 'onaa na 'ia Elaija 'ai boi 'anai ha'adiohia baaniai dadaahoro.”

³⁷Mia Jisas 'a totoro magu mae.

³⁸Mana bwana ubu-ubu'a nara rohe bwarasia 'iniai dora maea na'i Ruma Maea ana God, 'a maakari heihoa, taraawa'a bo ta'eha ma dio. ³⁹Na'i 'ohasi 'e na'otara adaui sae hehei'oi na ura na'i maanai dadaahoro ana Jisas. Mana 'oha na re'iai mae na haua, 'agu ha'atee o'ani, “Ha'amomori, 'ia mo'oni huunai garena God!”

⁴⁰⁻⁴¹Ma tara'i urao ra suria Jisas ara'a mai na'i Jerusalem. Rau awa gere ha'atau moi baaniai dadaahoro maraugu wanawana 'ari. Tara'i nei beirau, 'ira a Meri ni Magdala, 'ia Salome, mea Meri inana gere Jems mea Joses. Waira orusi rau bwane suria mau mai a Jisas 'anai 'a'auhia na'i madoraa na tatariori na'i Galili.

Josep Ni 'Arimatea 'A Aoraa Jisas

Na'i Wabwa

(*Matiu 27:57-61; Luk 23:50-56; Jon 19:38-42*)

⁴²Ma 'ari wou 'anai su'urahi'a mana dangi ni mamaro 'a gaarangi. Miraau na Jiu rau ha'aagau 'anai dangi hauasa adaausi. ⁴³Naasi ma'e sae na atana 'ia Josep ni 'Arimatea, 'a taha beia Paelat. 'Iiasi 'e ta'i sae na'i Kansol na rau hiiriasi a Jisas. Me 'ia 'e sae nara ha'ahoua. 'Iia 'a to'oraai 'adoma'i heitotori 'iniai madoraa na 'ia God 'ai marungiraui inoni ana'i. Ma rei'uaa na mamaa'u, me 'ia 'a taha beia Paelat ma o'ani 'inia, “Mwaeraha, 'inau 'au raba rahia dioi abena Jisas baaniai dadaahoro. 'A 'ua? 'A goro moi?” ⁴⁴Mia Paelat 'a o'ani, “'A 'ua? 'ia Jisas 'a mae'a?” Ma soiai bwauodo adaui sae hehei'oi na re'iai mae ana Jisas ma songa'inia. ⁴⁵Na'i 'oha na sae hehei'oisi 'a 'unua tanaa do'ia Jisas 'a mae'a, 'ia Paelat 'agu ha'awatea Josep 'anai rahia dioi abena Jisas baaniai dadaahoro. ⁴⁶Mia Josep 'a horiai bwana mamaahui, ma rahia dioi abena Jisas. Naasi 'a ho'ua 'iniai bwana, magu aoraa na'i wabwa ra 'eria na'i abenai kae hau. Naasi mara hugesia ro'u wou i kae hau bwarasiai maanai wabwasi. ⁴⁷Ma na'i 'ohasi, 'ia Meri ni Magdala mea Meri inana Joses raru awa ro'u 'isi ma raru re'iai dora na ra aoraa na'iei abena Jisas.

Jisas 'A Tahi Aho'i

(*Matiu 28:1-8; Luk 24:1-12; Jon 20:1-10*)

16 ¹Murinai dangi ni mamarosi, 'ia Meri ni Magdala, 'ia Salome mea Meri inana Jems rau 'ari hori'i waiwai nara dorari'i 'iniai hasi'e'i

15:38 Bwanasi ra rohea bwarasiraui sae baaniai ahii na maea di'u. Ta'i 'iraau Piriisi moi nara matai riri na'iei.

sisi'ini 'anai nuga'i na'i abena Jisas. ²Mana'i wa'aria na'i dangi sade, na'i 'oha na sina 'agu taraawa'a ara'a, rau 'ari na'i wabwa nara aoraa ieia Jisas. ³Na'i 'oha narau 'a'ari wou mau, rau heisosonga'i hairiu o'ani, "Ia tei nai 'a'auhigaau 'anai hugesia'i hau baaniai maanai wabwa?" ⁴Na'i 'oha naraugu ataha wou na'i dorasi, rau 'omesia doni kae hau raha di'usi ra bwane hugesia'a. ⁵Na'i 'oha naraugu siri wou na'i wabwa, rau re'iai sae na heinagu na'i aba odo. Mana saesi 'e sae haoru na to'oni 'inia to'oni mamaahu. Miraau kae mamaa'u di'u.

⁶Mana saesi 'a o'ani 'iniraa, "Moi abu mamaa'u! 'Au 'iraraa mou 'ome 'inia Jisas ni Nasaret nara rabua na'i dadaahoro. 'Agu ai'a awa'a 'ini, 'inia 'ia God 'a ha'a-suruta'ea aho'i baaniai mae. 'Ome! Naani dora ra aoraa iei abena. ⁷Moi aho'i 'ari mamoi maania tanaa Pita miraau haru tara'i rongoiusuri ro'u o'ani, "Ia Jisas 'ai na'o 'ari Galili 'ini'amou ma moigui sadoia na'iei 'onaai bwane 'unua ana tana'amou."

⁸'Oha rau hura'a baaniai wabwa, rau hora ha'i 'idi'idi 'inia mamaa'u. Rau ai'a maania ro'u tanaa ta nei, 'inia rau mamaa'u di'u.^f

Jisas 'A Ha'ata'i Tanaraui Nei Ra Suria

(*Matu 28:9-10, 16-20; Luk 24:13-49; Jon 20:11-23; Buka Tatau'aro 1:6-8*)

⁹Na'i haho'oa na'i dangi sadesi, 'oha 'ia Jisas 'a suruta'e aho'i baaniai mae, 'a ha'ata'i tanaa Meri ni Magdala na'i na'o, i urao na 'ia Jisas 'a taariai biu adaro baania ani. ¹⁰Ia Meri 'a 'ari beiraaui sae hagu hagu goro ana'ia Jisas, na rau ahutotou marau angi. 'A maania tanaraui ha'ata'i ana Jisas tanaa. ¹¹Ma na'i 'oha rau rongoa do 'ia Meri 'a re'ia Jisas, do 'a suruta'e aho'i baaniai mae, rau ai'a hinihinia.

¹²'E ta'i 'oha ro'u 'ia Jisas 'a ha'ata'i tanaa rua rongoiusuri 'oha raru bwabwahe ha'atau baaniai 'omaa. Na'i 'ohasi raru ai'a 'ome 'iraraa Jisas 'inia na 'omehana 'a orisi. ¹³'Oha raru aho'i mai, raru maania tanaraui tara'i rongoiusuri ro'u, me 'iraa ai'a hinihiniraru ro'u.

¹⁴Ma ha'ata'i ha'ahako tanaraui ta'i tangahuru mana waira ta'i rongoiusuri ana na'i 'oha rau ngau goni. Ma ha'atee wetewete tanaraui 'inia ra baabau tahingadaa'i. 'Inia rau ai'a hinihini'i mamaani adaa'i sae na ra re'ia Jisas do 'a tahi aho'i. ¹⁵Miagu o'ani ro'u 'iniraa, "Moi hura'a suri'i mwane dora na'i marewana, mamoi taroha'inia hura'ai Taroha Goro tanarai mwani noni hako. ¹⁶'Iatei nai hinihinia Taroha Goro maai bwareomaea, 'ai to'orai tahi tarau beia God. Mana nei na bwa'i hinihini, 'ia God 'ai hiiri ha'a-mama'aia marai gaasia na'i dora ni rongomaata'i. ¹⁷'Irai sae ra hinihini, 'ia God 'ai haua tanaraui mena 'anai hau'i mwani ha'abu'oahu. Ma rai taari'i adaro 'inia atagu, marai matai ha'atee 'ini'i mwani ha'atee he'ete'i hairiu na ra ai'a 'irara'i mau. ¹⁸Rei'uaa rai daa'i mwaa ta'a'i ma'ua gonohi'i maho mamaesi'i ma ra bwa'i maesi'i. Ma rai nuga'i rimadaa'i na'i hungadi sae daoha marai goro aho'i."

^{16:8} Tara'i kopi bwani 'inia bukani ra hako moi na'i tatara 'e waru. Na'i muri ra a'oa wou tatara 'e siwa 'ari tari tatara 'e 20.

Jisas 'A Ara'ai Aro

(Luk 24:50-53; Buka Tatau'aro 1:9-11)

19'Oha 'ia Jisas 'a maani'i hako tanaraau rongoiusuri mareho 'isi, mia God 'a waia'a ara'ai aro ma heinagu na'i aba odona God. 20Miraau rongoiusuri ana'i rau hura'a suri'i mwani 'omaa 'anai taroha'inia Taroha Goro. Mia Aaha 'a awa beiraa 'anai 'a'auhiraau. Rau hau'i mwani ha'abu'oahu 'inia mena ana, ma naasi 'a ha'ata'inia doni mareho narau taroha'ini'i ra ha'a-momori.